



弇山堂別集卷十一

吳郡王世貞元美著

皇明異典述六

宣德後許親王入朝

自宣德初止 漢趙二郎入臨 大行以後 親王

無入朝者惟 襄憲王爲 英宗叔父 邁于王金符

之嫌賴 上仁明不爲動而 王於景泰中疏奏

皇太后問 上起居及勸景帝朝 上於南城俱

番中上見之大感悅特許入朝 陛見後躬至內殿行

家人禮宴賚加渥親送至 大明門而別再朝復

如之爲崑山漢水賦寓思特置一護衛衛王護衛時
不置久矣又詔王春秋高歲時得游觀田獵不爲例
今所存御書婉敬剴篤雖漢肅之於東平不能擬其
萬一也姪御名奉書叔父襄王承諭具悉尊意所以
惡景諱之僭分而喜姪之復位及曩有陳言慰安章
初未嘗達 皇太后所蓋爲景諱之所蔽匿也今已於
景諱宮檢而得之姪親覽之再三深見叔父忠愛之誠
蒞於讜論抑邪扶正防微杜漸無非爲 宗廟 社
稷計惟叔父之心即周公之心也叔父二章亦即金
滕之書之比也 皇太后聞之感嘆不已承昇祥雲

捧日玉帶謹以領訖叔父云欲親行朝見本不敢煩
遠來第念 先帝同氣至親惟叔父宗室至賢亦惟
叔父于情于誼不可不重得一見以篤親上今遣太
監夏時齋奉勅符及書迎請即時氣候清和叔父宜
從容就道宮眷世子郡王宜留藩邸其當從行之人
亦隨尊意帶來竚俟其至惟叔父亮之

皇貴妃冊寶

故事 皇后金冊金寶 皇貴妃而下有冊而無寶
獨宣德元年以貴妃孫氏有容德請於 皇太后製
金寶賜之且命太師英國公張輔爲正使少師吏部

尚書蹇義爲副使二公元臣也蓋未幾而貴妃有子冊東駕軒龍亦易位矣自是貴妃授寶遂爲故事

東宮送公主入邸

寶慶公主者 高帝幼女也 文皇既定京師俾仁孝皇后女之十九歸駙馬都尉趙輝資班比諸公主特厚時 仁廟在東宮特令送之至邸亦殊典也輝父趙和以千戶征安南戰歿輝襲職守金川門上見其貌偉麗而悅之遂令尚公主時未樂之十一年也輝歷掌南京兩都督宗人府主 孝陵祀至成化十二年乃卒爲駙馬者六十五年母孫氏守節被

旌壽亦至八十餘夫婦以忠節顯而輝極富貴壽履之隆可謂希世之邁矣

賜印記

高皇帝賜 懿文太子白玉印方一寸二分曰大本堂記賜 中宮皇后白玉印方亦如之曰厚載之記文皇帝賜 仁廟玉押曰人主中正仁廟即位時 宣廟方爲 皇太孫復舉以授之命印識章奏

國朝惟 仁宣二廟優禮大臣賜銀圖書以示褒美後亦有嗣行之者按

仁宗朝蹇義夏元吉楊士奇黃淮楊榮金幼孜俱被賜其文曰繩愆糾繆而義又有蹇忠貞士奇楊貞一之印 宣宗賜義曰忠厚寬弘原吉曰含弘貞靜士奇曰清方貞一榮曰方直剛正胡濙曰清和恭靖又文恭世家吳中曰和敏詳達

景泰賜少傅胡濙曰忠貞惟篤少保王文曰忠誠匪懈衍聖公孔弘緒曰謹禮崇德按是時王少傅直陳循高穀于謙三少保當亦有之特以景廟賜不敢登之志傳耳 世宗朝與賜者楊一清張孚敬桂萼李時費宏夏言顧鼎臣翟鑾方獻夫嚴嵩郭勛仇鸞楊

曰耆德忠正又繩愆糾違張曰忠良貞一又繩愆糾違又別記未嘉張茂恭桂曰忠誠靜慎又繩愆匡違李曰忠敏安慎方曰忠誠直諒費曰舊輔元臣夏曰學博才優顧曰經緯首選翟曰清謹學士又繩愆輔德嚴曰忠勤敏達勛未攷仇曰翔卿又曰朕所重惟卿一人

今上以少師張居正乞歸葬範銀爲圖書以賜之俾得馳傳密封言事其文曰帝賚忠良

憲廟持賜方士李孜省銀圖書二曰妙悟通玄曰忠貞和直得密封言事又鄧常恩圖書一曰橐籥

陰陽蕭崇一圖書二曰至真玄妙曰丹霞歲月
世廟賜真人邵元節白玉印文曰闡教護國烏玉
印文曰太和子真人陶仲文白玉印文曰凌虛子
烏玉印文曰林隱銀記曰秉一保國

宣廟賜太監金英范弘各銀記其文不傳又賜玉
御用瑾銀記四曰忠肝義膽曰金貂貴客曰忠誠
自勵曰心跡雙清 憲廟賜覃司禮昌牙記二曰
忠誠不怠曰讓亨忠敬銀記一曰才華明敏石記
一曰補袞宣化 世廟賜張司禮佐銀記四曰集
謀補德曰端忠誠慎曰輔忠曰勵忠麥司禮福銀

記一曰恭勤端慎其他未能悉數蓋中貴人得之
不難若大臣則爲異典耳

特賜黃金牙刻關防

國朝文武臣領勅行事者俱給關防以銅爲之其模
制大小雖相臣行邊與部屬無異獨正德間太監張
永征安化王及再督三關用金鑄見楊文襄一清所
撰墓志文襄與永同事所紀當不謬嘉靖間大學士
顧公鼎臣居守用牙刻關防賜之皆 特恩也

文臣賜第

文臣賜第京師若

高帝時有之以後蹇忠定夏忠靖楊文貞楊文敏胡忠安吳榮襄至翰林臣曾榮王英在 宣廟俱有賜文貞力辭而止于肅愍陳芳洲高文義王毅愍高文毅在 景廟亦有之袁彬所請則文毅賜第也天順李文達王忠肅馬恭襄俱有賜第又爲忠肅造第原籍鹽山嘉靖間張文忠治第京師 上聞以銀幣羊酒落之今人不考遂以爲 賜第非也其原籍始以書院請 特命有司給夫價資營造後夏文愍亦繼之然不名言賜也萬曆元年今江陵築第故里上特輟 御前白金千兩遣官齎送

嘉靖中既爲真人尚書邵元節陶仲文治顯靈宮於內開法局而宮外復起大第其盛尚書端明顧尚書可學俱有 賜第乃至通妙梁敬人方士段芻子亦有之不足爲異也

特賜額號

高帝以魏國公達勛業非常於居第左右特各建一坊榜曰大功又特署八字於德慶侯廖永忠門曰功超群將智邁雄師以旌異之後襄陽任亨泰爲禮部尚書得幸勅於原籍立狀元坊不爲例又親書孝義門三字署於浦江鄭氏之門皆非有司所請也

世宗時因張文忠請立書院仍親定名曰貞義堂曰
抱忠樓曰寶綸及京師居第成賜以 獻皇帝御書
榮恩堂字識其端曰 皇考手澤又賜銀印篆刻所
賜字敬字及白金四鎰彩帛四束羊酒餼饌等物諭
曰前聞卿自爲堂曰榮恩所謂榮得君恩也朕思
皇考嘗手書三字朕恭裝軸茲併銀印一枚及絲帛
等物以爲吾君臣相慶之意庶見朕意云耳後楊文
襄樓曰寶翰夏文愍書院曰忠禮堂曰瓊恩樓曰寶
澤李文康樓曰玼謨汪榮和樓曰昭恩甘少保樓曰
尊恩嚴分宜高新鄭亦各沾賜分宜堂額曰忠弼樓

曰瓊翰流輝供玄像閣曰勅賜延恩之閣京師堂曰
忠正南昌樓曰寶翰堂曰耆德新鄭樓曰寶謨堂曰
鑒忠陶秉一原籍書樓曰聖翰瓊光

今上爲張江陵賜堂額曰純忠其左扁曰社稷之臣
右扁曰股肱之佐堂對曰志秉純忠正氣垂之萬世
功昭捧日休光播於百年樓額曰捧日皆 御筆

賜號旌獎

金鄉忠壯侯王真以死難洪熙初進封寧國公加賜
號曰効忠少師蹇義少傅楊士奇以輔導功洪熙初
賜蹇號曰蹇忠貞楊曰楊貞一都督僉事楊俊以擒

喜寧功景泰中進左都督特賜號曰忠能又真人劉淵然洪武初至京特賜號曰高道

賜宴華蓋殿

文皇帝時友愛諸弟每來朝 賜宴於華蓋殿辭亦如之世子郡王則 皇太子宴於文華殿獨宴尚師哈立麻亦華蓋殿蓋以 親王例賓之也十九年特宴工部尚書趙玃於華蓋殿以尚書夏原吉九年滿上親宴之武英殿一時咸以爲榮

輔臣三載考績宴禮部

永樂間尚書滿九載如趙玃夏原吉蹇義方賓左副

都御史李慶賜宴華蓋等殿後內閣一品九載亦有宴獨萬曆十三年少傅申公滿三載特賜宴禮部九卿三品皆陪列蓋無前之典也又三年以少師滿復如之上疏辭賜折宴白金五十兩文綺四端

賜禁苑乘輿

宣宗時張太師輔蹇少師義楊少傅士奇夏少保原吉楊宮傅榮金宮保幼孜於西苑讌游俱騎而從時致仕少保黃淮以謝息至京亦得從因病瘵特給肩輿嘉靖中勲輔郭太師勛夏少師言等前後以入直西城賜乘馬夏公及翟少傅鑾乃私以小輿使人腰

之而行 上聞不善也 寂後分宜以老特許乘腰輿
年八十加息賜肩輿俱禁中古今所未有之典

賜禁苑直舍

上在西城因賜諸入直大臣廬於無逸殿之左右廂
然頗隘而受日至丁巳特建一舍於殿東官道之左
以居分宜廳事皆南向別館庖廡皆具又出百金以
制一切器用分宜遂遂以居華亭公亦我 朝希曠
之典

車駕東宮迎送功臣

洪武三年征虜大將軍信國公徐達左副將軍李文

忠等討虜師還

上自出勞於江上二年征南將軍廖永忠副將軍朱
亮祖等師自廣西還上遣 皇太子率百官迎勞於
龍灣既 陛見 皇太子送還第十五命征南將
軍穎川侯傅友德副將軍永昌侯藍玉西平侯沐英
等討雲南永樂五年征夷將軍成國公朱能副將軍
新城侯張輔等討安南俱

上親餞之龍江正德中太監張永討寧夏叛王徃迴
上迎送於東安門外

天子臨吊

高帝聞中山王訃至被髮徒步往哭又親至龍江迎祭常開平鄧寧河國初優禮大臣固已如此後唯

武宗臨祭張英公懋每一奠酒其家進五百金凡九奠南巡幸靳文僖第令胡僧造座懺悔

行幸大臣

高帝於魏曹二公及大勳臣第往七臨幸以爲常

宣宗皇帝嘗夜幸楊文貞第又幸英國公輔第畱飲賜金帛又與中宮幸會昌伯孫忠第宴賚尤厚

武宗南巡幸致仕楊相一清家飲宴三日賦詩酬和揚大出珍寶爲壽至淮安幸總兵官鎮遠侯顧仕隆

第

皇太后賜見

宣德六年上奉皇太后謁二陵召少師蹇義

少傅楊士奇太子少傅楊榮太子少保金幼孜太常

卿楊溥於幄殿面加慰諭賜白金綵幣酒饌萬曆六

年江陵還自葬父入謁仁聖慈聖俱加慰諭

宴賚尤厚

御製神道碑

國初文武大臣薨逝例請於上命翰林儒臣製文立碑以後漸不請惟中山王姚恭靖乃

二聖御筆弘治中昌國公先塋亦然若永嘉侯壙志之類則上偶爲之非以爲榮重也

御製紀功文

高帝時城元城陳城張最爲宏鉅之績而未有如椽之筆以紀之至平夏明氏獨以劉文成上頌不自居而歸功於臣下然亦傳潁川廖德慶之殊遇也謹錄如左

洪武四年九月三十日朕親紀征蜀二道揔兵官功之低昂以旌忠勇有智之將又張無謀鈍兵之徒爾基再作平蜀頌一章爲傳將軍廖將軍千萬年不朽

之功朕聞雲從龍風從虎聖人作而萬物覩此蓋上古聖君臨御恩及海內故賢者讚揚若非聖君安敢受此美稱善揚者也朕本淮民因元失政豪傑忿爭吾承人後偶獲多兵訓練爲我調用有時命將四出有時親征一方十五六年間群雄歛跡惟西蜀一隅限山阻險是有戴壽者假明之童孩負固不伏陰生詭計說誘諸洞蠻夷爲我邊民患於是發兵二道命將分討三年冬平章楊璟德慶侯廖永忠率舟師抵瞿塘戴壽以全蜀軍民與之決戰平章楊璟兵敗收兵僅能與之對壘當年冬潁川侯傅友德將兵由西

番道經階文逾月而抵綿漢蜀兵莫敢當鋒其戴壽者恃瞿塘之險選老弱守之西行與穎川侯一戰戴壽披靡再戰困逼成都其攻瞿關舟師搃兵者尚未盡知將軍穎川侯木牌書其戰勝次第順川江而放流德慶侯獲之連壘而進擣機破關而至偽京師幼主明昇啣璧請降戴壽為傳將軍生擒於成都于是中國清寧論將之功傳一廖二低昂定焉

天佑我邦 師出以律 將忿揚 馬嘶蹄踏

盡角聲張 惟我穎侯 智勇難量 羗人稽首

壺漿道傍 勞我軍行 綿漢是行 蠢爾戴壽

率衆來當 一戰披靡 拒城且藏 旬日困逼

詣軍請降 傳將功就 再歌瞿塘 天生廖將

與傳成雙 江風浩 起我旌幢 泊舟連壘

直破瞿關 生俘偽主 市肆無干 遣使飛捷

一刻數關 天產名將 兵出農間 非朕有能

實由天監 有臣在商 家居括蒼 生而能文

舉筆何難 謂我採擇 黼之班 誦此則主帥湯中山愧汗無地而楊平章者不知

死所矣然後六年中山進封公而穎川以平雲南

始亦進封然傳竟不得與中山同贈王而德慶亦

始亦進封然傳竟不得與中山同贈王而德慶亦

不獲與平章同贈公事固不可量也

賜調甘露漿

洪武六年正月丙午 上御武樓召御史中丞陳寧
太子贊善大夫宋濂賜坐談嘉祥之應 勅中使入
取所儲甘露於宮中盛以翠罌玉絜珠圓世所未觀
已而舁爨器至用金灼煉水二升火勢既勻水湧成
波 上起自龍帳中親啟罌以投須臾融化與水爲
一 上取罌傾瀉二內侍舉幕承之渣滓已盡重漉
以絳紗囊 上飲一爵而分賜寧與濂曰此天地至
和所疑也卿等服之去沉疴享遐齡矣寧等飲畢奠

爵于几頓首而退賦詩以記其榮又一日與濂飲濂
素不勝杯杓舉觴即辭 上強之至三觴面如赭行
不成步 上歡笑親御翰墨賦楚詞一章以賜仍命
群臣賦醉學士歌且曰令後世知吾君臣同樂如此
也復以濂乏騎乘勅 皇太子選良馬以賜
上親作馬歌命近臣咸和之俾濂藏之爲家寶

君臣同遊

嘉靖十年 上召大學士張孚敬尚書李時於西苑
視蚕壇地賜酒飯珍餌御製西苑視穀祗先蚕壇位
賦手授孚敬曰朕適有作卿等刪潤因命和以寓警

戒之意孚敬請上手書各賜以爲子孫世寶許之
明日二臣進和賦上亦各賜手書御製賦如所請
後數日併裝成帙名曰詠和錄賜之已復諭璉曰朕
惟君臣之際固不可不嚴此在朝廷當慎他處則猶
家禮然且漢文之召見賈生同語久而文帝爲之前
席今亦稱羨故君臣不交治功安成况朕在冲昧世
事未經無一識見卿之於朕無異周公愛成王首以
孝訓于朕他特餘事耳卿夙夜在公敬君盡禮昨見
退遜太過恐非輔臣之于君者夫何謂輔導大臣與
他諸臣不同故曰導之教訓傳以德義保其身體此

則不可以朝之制相與明矣今後凡會議或卿有
所以奏無拘時而來面相計處俾交脩朕之性志
有定方可廣接他人庶有所酌別賢否耳朕又欲
於今春奉兩宮春游後與卿輩一遊以仰遵我
聖祖丕訓亦以見幼孫之率由祖道當有宴樂預
與卿言之十五年端陽節賜文武百官宴於奉天殿
宴畢上幸西苑預命侯郭勛大學士李時尚書夏
言候於崇智殿遣中官賞賜艾虎花絲百索牙扇等
物上至勛等致辭謝上曰今日之宴一以賞節
一以酬前月山中扈從之勞勛等頓首謝至水次

上御龍舟召勛等各乘舟給酒饌命楫夫槳三臣舟
近龍舟而行自蕉園迤邐至澄碧亭登岸復宴無逸
殿勛等各稱觴上壽盡歡而罷

宴坐超本列

永樂中北征還大宴群臣第功時大學士楊榮金幼
孜以五品特勅與兵部尚書方賓同列而坐嘉靖中
恩榮宴於禮部讀卷官少詹事兼學士李本秩第四
品以內閣故特奉 旨班尚書末久之復舉恩榮宴
巡綽官太保左都督陸炳亦奉 旨班尚書末蓋少
詹都督故事當東西嚮坐耳萬曆初內闕吏侍申時

行亦班坐尚書末用本例也

賜大臣父母

文皇既宴尚書趙玘於華蓋殿輟 御前酒饌悉以
賜其母又以元宵節宴群臣知尚書夏原吉母觀燈
賜酒食鈔二百錠

今上嘗以大紅蟒紗衣一襲銀錢二十兩賜張江陵
父以 聖母命玉花墜七件彩衣紗六疋賜其母尋
父封少師文明卒後奉母入京 上及三宮俱有賜
上賜金嵌寶首飾一副銀八寶一百兩青紅蟒衣四
疋裏絹四疋甜食盒一副 仁聖太后金首飾一副

紵絲六表裏食盒八副 慈聖太后金嵌寶飾一副
珍珠環一雙青紅蟒衣二套銀八寶五十兩食盒八
副

二品賜玉帶

玉帶爲一品常繫服色大臣品未及而特賜者許繫
今人不知往也以爲玉帶非賜不得繫誤也其未至
一品而賜玉者洪武中弘文館學士羅復仁天順中
尚書王翱馬昂大學士李賢成化中尚書白圭弘治
中大學士李東陽謝遷翔賢東陽遷旋加至一品正
德則太學士王鏊費宏楊一清靳貴尚書曾鑑許進

頤佐劉璣孫交石玠楊潭李傑張綵劉機曹元王敞
白鉞李遜學王鑑之毛澄右都御史王鼎內鑿宏一
清貴旋加至一品嘉靖中非一品而賜者大學士袁
宗臯尚書邵元節陶仲文郭文英也元節以下皆異
流圭鉞父子俱官太子少保而沾此賜充奇

賜坐

洪武中大臣如魏國公達等不時賜宴預坐及學士
承旨宋濂等隅坐講論至

仁宗亦然正統以後廢矣雖

孝宗之敬禮閣臣

世宗之寵眷張夏叩頭長跪不聞坐論也嘉靖末分宜賜坐一次惟真人陶仲文召對坐無筭乃至陶

南西嚮上北東嚮以陶坐繡墩上亦坐墩不設

御坐入則迎於廷出則送至門握手乃別

手札不名

高帝嘗與劉誠意宋承旨書御諱頓首復伯溫老先生及景濂先生是時爲國公也

世宗手札貴溪爲公謹分宜爲惟中然不過三四而已余見永嘉奉御札百餘道內二十餘道稱元輔張羅峰或大學士張羅峯或張少師羅峰又面呼羅

山遂有御札稱少師張羅山最後一札稱茂恭當時楊石淙桂安豐應亦有之而余未之見

今上御書與江陵自萬曆元年十一月以後皆不名內聖諭先生故沃朕心平治天下功已在社稷茲當六年考滿特於例外加賜銀一百兩蟒衣斗牛各一襲少示優眷不必辭又諭朕聞先生父母俱存年各古稀康健榮享朕心嘉悅特賜大紅蟒衣一襲銀錢二十兩又玉花墜七件綵衣紗六疋乃奉

聖母恩賜咸欽承旨家僮往賚之外銀錢二十兩是先生的又手諭白燕蓮花俱進獻

聖母甚是嘉悅却獨產翰林院中先開於密勿之地
上天正假此以見先生爲社稷祥瑞花中君子朕賴
先生故沃固不敢顛縱何德之有又御筆 勅諭元
輔張少師朕以幼冲嗣位賴先生匡弼啟沃四方治
安九邊寧靜我

祖宗列聖亦鑒知先生之功就加顯爵不爲過乃屢
辭恩命惟一誠輔國自古忠臣如先生者罕朕今知
先生實心不復強特賜坐蟒衣一襲銀錢五十兩以
示優眷用成先生美德其欽承之故諭以後辭禮益
鄭重不可枚舉江陵歿凡有諭蒲坂吳縣亦多不名

詔勅不名

吳元年

上諭諸將謂張氏既滅惟大將軍於貨寶無所取婦
女無所近其深謀遠略蓋謂中原未平民未休息豈
可遽恃爲安乎爾等當如大將軍所存共圖大勳康
濟宇內洪武三年議賞將士詔稱大將軍等運謀竭
忠六師用命遂致強殞弱伏疆宇奠安諸番入貢華
夷一統四年命左右丞相詔稱大將軍左右解甲於
武備之庫息馬家庭從善樂游功名兩全古何過哉
皆謂中山王也十八年王沒詔一勅三俱稱中山武

寧王開平忠武王而皆不名至永樂戒諭勛戚大臣
皆稱我中山武寧王而不及開平矣蓋中山以先朝
元勛且有椒房之重故也

萬曆初江陵

尤被隆禮凡內閣

勅諭部疏

御批俱稱

元輔或張先生而不名其聞喪以後尤委曲敦至
勅諭中外凡大事待張先生還朝而行又以遼左報
捷諭內閣歸功元輔平日加意運籌候疏上卿等一
錄封此諭着兵部差人星夜馬上前去與張先生看
隱然文終宣成之不名矣

行人齋旨取尚書

自弘治以後內閣輔臣體重故取復位者必遣行人
以示優異若尚書雖吏部亦不復爾惟嘉靖初取摠
制三邊尚書王瓊回京別用自原籍取吏部尚書方
獻夫別用俱遣行人瓊入京補吏部獻夫入京進內
閣而其時自原籍召大學士桂萼却不遣行人同官
張璁爲之請亦不許隆慶中自原籍召大學士高拱
亦不遣行人不知爾時事體云何聞高頗以是不樂
其同事諸公

宴賞下僚

洪武中特宴勞吳山縣主簿隨贄於別殿賜白金五百兩文綺及帛各百疋陞知縣以奮義平賊也贄後至按察使有嚴

大臣面呼先生

英宗自李文達獨見則稱先生其稱王忠肅多曰老王

孝宗自丁巳後召見劉文靖等必稱先生馬端肅劉忠宣則稱老尚書見天順日錄燕對錄可證萬曆初元

上敬禮江陵稱先生雖宮中亦稱張先生嘉靖末命

宮中不得名華亭公稱徐閣老皆異數也

大臣賜衛士

天順陳汝言弘治馬端肅文升俱以兵部尚書爲怨家所中詔特給衛騎護之陳五十人馬十二人嘉靖給兵百人爲大學士楊文忠廷和夏文愍言直宿出入衛從

賜禁衣

嘉靖庚申上勅南京織閃黃補麒麟仙鶴紗衣各一副賜分宜閃黃色惟上得用之甲子賜華亭教子升天蟒衣一係上手擇有珠者萬曆甲戌上

以江陵辭功賞特賜坐麟已後賜皆如之而最後武靖侯李偉以太后父沾馬坐麟者惟司禮大璫掌印父爲上所重者得此賜然累代不數人即勛舊所不與也

賜衣文武互異

嘉靖中內閣嚴徐李皆賜服麒麟麒麟公侯服也而成國公朱希忠京山侯崔元左都督陸炳等以玄壇供事特賜服仙鶴仙鶴文臣一品服也成化以後文臣賜麟不爲異而公侯伯武臣賜鶴則異矣六公出入朝行殆不可復辨

五品鶴袍

嘉靖中學士嚴訥李春芳董份以五品撰玄詞特賜仙鶴袍既而上悔之下諭謂玄壇供事可用鶴餘則不可意蓋爲三臣也而尚書皆自疑不敢衣鶴亟市錦鷄爲飾而三學士之衣鶴自若也

賜士官服色

正德中賜播州宣慰司楊斌麒麟衣一襲陞四川按察使後以宣慰致仕復賜麒麟衣一襲最後賜蟒衣玉帶以貢物厚故也賜未順宣慰使致仕彭世麒大紅蟒衣三襲陞都指揮使其子宣慰明輔大紅飛魚

服三襲給正三品散官誥命以進大木故也嘉靖末復以進大木賜致仕宣慰彭明輔蟒衣進湖廣都指揮使致仕子宣慰翼南飛魚衣一襲進雲南右布政使正德賜日本使臣宋素卿大紅飛魚服一襲中人瑾受其黃金故也素卿閩人至嘉靖中始以爭貢事論死

賜尚師儀仗

今公侯前導止藤杖一對鞍籠馬杌一對而已攷之國初有公侯儀仗戶當不止此未樂中賜尚師法王哈立麻牙杖二金瓜二骨朶二幡幢二十四對銀香

爐合二拂子二銀手爐三對紅紗燈籠一對鮎燈二對傘二銀交椅一銀脚踏一銀水罐一誕馬四鞍籠二銀杌一青圓扇一紅圓扇一帳房一紅紵絲拜褥一玉印誥命織金珠袈裟金銀器皿成化中法王劄巴堅叅賜儀仗亦如之特許用櫻轎前後皆以錦衣校卒供應見者皆以爲親王

弇山堂別集卷十一

弇山堂別集卷十二

吳郡王世貞元美著

皇明異典述七

勛臣超贈

勛臣贈爵超踰本階者寔出一時 特恩皆記之
侯超贈王者西平侯沐英爲黔寧主

一品超贈國公者中書平章政事俞通海爲虢國公
都督同知康茂才爲蘄國公

二品以下超贈國公者親軍都指揮使馮國用爲郢
國公江浙行省叅政胡大海爲越國公樞密僉院趙

德勝爲梁國公張德勝爲蔡國公指揮使丁德興爲
濟國公

三品以下封郡公者樞密院判耿再成爲高陽公元
帥俞廷玉爲河間公武德衛指揮副使茅成爲東海
公海寧衛指揮副使嚴德爲天水公樞密僉院丁普
郎爲濟陽公封郡侯者樞密院判花雲爲東丘侯都
指揮使韓成爲高陽侯樞密院判李繼先爲隴西侯
右副指揮劉齊爲彭城侯統軍元帥許圭爲高陽侯
左副元帥趙國旺爲天水侯左副元帥呂文貴爲汝
南侯右副元帥余杲爲下邳侯水軍元帥宋貴爲京

兆侯副元帥王勝爲太原侯太平興國翼元帥陳兆
先爲穎上侯秦淮翼右副元帥李信爲隴西侯行樞
密院判官張志雄爲清河侯水軍元帥同知李志高
爲隴西侯金斗翼左副元帥徐公輔爲東海侯水軍
右副元帥劉義爲彭城侯金斗翼右副元帥陳弼爲
穎川侯

又鄉人布衣劉繼祖爲義惠侯

右其時稱郡公郡侯者尚因元制不爲極品第視
本秩則超等矣文臣封爵已見前故不復贅

又都督副使孫興祖爲燕山侯靖江王相蔡仙爲安

遠侯指揮桑世傑爲永義侯燕府左傅丘廣爲昌樂侯都督僉事王簡爲霍山侯高顯爲汝陰侯何德爲廬江侯孫世爲富春侯陳清爲合浦侯陳文爲東海侯於顯爲英山侯廣西都指揮使王真爲臨沂侯指揮副使孫虎爲康安伯虎賁衛指揮潘毅爲滎陽伯行省叅政戴德爲譙郡伯

按自二年以後侯爵重矣伯亦次之故兼紀焉然自都督以至同知俱無贈而贈者獨都督僉事又不可曉也

未樂初以靖難陣亡贈都指揮同知張玉爲滎國公都督僉事陳亨爲涇國公都督僉事譚淵爲崇安侯右護衛百戶王真爲金鄉侯下安南陣亡贈都督僉事高士文爲建平伯世讓又都督僉事張欽爲新泰伯孫榮爲萊陽伯程寬爲保昌伯金玉爲惠安伯

公孤超贈

故事文臣少師少傅少保贈太師太傅太保東宮三太贈三少東宮三少贈東宮三太然亦有不及等者有超等者今記其超等者於左

少保夏原吉少保楊溥少保李賢少保彭時太子太保儀銘太子太保王恕弘文館學士劉基俱贈太師

劉錐封伯尚二品也太子太保靳貴吏部左侍郎曹
鼐俱太傅尚書胡濙王直高穀尹旻俱太保尚書金
忠學士胡廣俱少師尚書苗衷侍郎馬京俱少傅太
子少保尹直尚書陳洽鄭埜王佐侍郎墨麟俱少保
侍郎王一寧太子太師侍郎王鍾儀智俱太子太保
少詹事鄒濟左贊善徐善述興府長史張景明俱太
子少保右贊善王汝玉太子賓客

燕府長史朱復北京行部尚書行太僕少卿孫瑜戶
部尚書北平布政司叅議成璉吏部左侍郎

按儀忠襄王端毅遂超八等而為三公首曹文襄

以三品遂得三公尤為異也胡王高尹雖嘗為師
傅等官後皆辭削其歿也實以尚書請

累贈官

洪武贈平章廖永安楚國公再贈即國公俞通海豫

國公再贈虢國公

避二王封也

贈僉都督濮英金山侯再

贈樂浪郡公贈舍人張子明為千戶再贈忠節侯贈

樞密院判耿再成高陽郡公再贈泗國公贈指揮使

丁德興都指揮使再贈濟國公永樂贈都指揮張玉

榮國公洪熙再贈河間王贈左都督徐增壽武陽侯

再贈定國公贈百戶王真金鄉侯洪熙再贈寧國公

贈太子少師姚廣孝榮國公洪熙再贈少師贈文淵閣大學士湖廣爲禮部尚書洪熙再贈少師贈北平布政司叅議成璉吏部左侍郎洪熙再贈兵部尚書洪熙贈少詹事鄒濟太子少保成化再贈太子太保景泰贈會昌伯孫忠爲侯天順再贈太傅安國公成化三贈太師景泰贈吏部左侍郎兼翰林院學士曹鵬爲少傅吏部尚書文淵閣大學士天順再贈太傅正德贈右都御史史琳太子少保再贈太子太保贈少師太子太師吏部尚書馬文升特進榮祿大夫太傅嘉靖再贈左柱國太師贈江西按察司副使許達

左副都御史再贈禮部尚書萬曆少師太子太師吏部尚書楊博贈太傅少師大學士張四維俱再贈特進

致仕給祿

致仕官給全俸洪武中兵部尚書單安仁唐鐸嘉靖中少保禮部尚書席書給半俸者永樂初吏部尚書張統戶部尚書王鈍宣德中戶部尚書郭資太僕寺卿趙昱

辭官加秩

弘治中成國公朱儀辭南京守備魏國公徐備辭掌

南京中軍都督府請專奉 孝陵祀不允辭加太子太傅嘉靖初魏國公徐鵬舉復辭南京守備及府任請專奉孝陵祀不允辭加太子太保

致仕加級

成化中致仕太子少保大學士商輅進少保南京吏部尚書陳俊戶部尚書翁世資加太子少保弘治中上隆禮大臣尚書致仕有兼官者多加從一品宮臣無兼官者多加從一品散官如白宮保昂徐宮保貫加太子太傅徐尚書瓊周尚書經王尚書試俱加太子太保蓋援商公例也正德初閔莊懿珪以宮保加

少保劉忠宣大夏張尚書昇屠尚書鄒閻尚書仲宇何尚書鑑田尚書景賢俱加太子太保嘉靖初彭宮保澤加少保孫尚書交林尚書俊陶尚書琰俱加太子太保吾太倉毛尚書澄加太子太傅已後恩典絕少惟嘉靖五年少保禮部尚書席公書以目疾乞致仕特加武英殿大學士給全俸賜第京師仍許不時言事大學士從來不爲加官而全俸亦百五十年所闕之典也蓋以議禮加厚耳然 命下三日而卒竟不得沾息隆慶四年大學士陳公以勤致仕加太子太師吏部尚書蔭錫郵護寂隆萬曆二年工部尚書

朱公衡三年左都御史葛公守禮乞休俱以九六年滿朱加太子太保葛太子少保十五年南京吏部尚書袁洪愈加太子少保南京大臣加秩自袁始也勳臣如太子太保鎮遠侯顧寰辭府事特加少保尤爲殊典

致仕後加官

景泰中致仕右長史楊翥以潛邸恩進禮部左侍郎來朝再進尚書正德中致仕國子祭酒章懋遷南太常卿南禮部侍郎不赴嘉靖初以舊德褒進尚書致仕南京給事中史後以曾言事進光祿少卿以助賑

荒再加四品服色嘉靖初致仕戶部尚書韓文以守正褒進柱國太子太保柱國三年滿始得之於致仕後加尤爲希曠之典提學副使潘府初加太僕少卿再以薦改太常少卿俱致仕後萬曆中養病吏部尚書嚴清禮部尚書陸樹穀俱加太子少保又嘉靖中開住右通政呂希周以倭功遷通政使開住吏部主事史際以倭功遷尚寶卿再遷太僕少卿開住應天府丞朱隆禧以進藥餌遷太常卿禮部左侍郎隆慶初開住右諭德唐汝楫以宮臣加太常少卿俱仍致仕於乎均一異恩也

際即後之子

致仕任事

洪武末兵部尚書唐鐸以致仕尚書起叅贊征南夷軍務竣事歸里鐸凡三爲兵部一兼詹事一兼賓客一兼太子少保卒後上親爲祭文賜葬恩禮之渥一時莫比

今職古銜

世廟好用古官名又最重典禮故於貴溪分宜鉛山華亭泰和常熟興化諸公徃匕傳旨稱大宗伯太宰又于少保胡公宗憲總督江西福建軍務旨云大司馬兼院右正題少師大學士費公宏詠春同德

錄曰內閣掌叅機政輔導首臣費宏尤爲新奇

用給事御史

高帝時給事中品秩不甚崇而所選皆正途至永樂中不無猥雜其他以國子生廕恩得者所不道姑記之則貴州清遠衛軍羅義上建文君請與燕講和下獄又皇下京師即日破械出之拜戶科給事中明年遷左叅議復以長史司吏楊勉爲給事中後遷都給事中又永樂中淮安山陽縣民訟師丁珏誣告里中富人妖言惑衆坐死者十餘人法司薦其忠直特拜刑科給事中

御史除授正統四年以刑部照磨陳嶷司務楊恕李儼陸瓛行人司副劉克產序班王盛正字沈寅孔目劉烈審理副郭鉦按察司經歷計珩副斷事楊綱鹽井提舉邵盤縣丞安珣趙瑜試御史五年以序班張鏞孫睿趙倫斷事張文昌知事康榮照磨張禮判官胡信縣丞鄺傑教授上官民瞻教諭韓楊鄭顥訓導鄭觀曹泰成規齊韶王巍陸儔唐震實授御史自後始專以進士行人中書舍人博士推官知縣國子監官而雜職不與矣然猶有國子監生天順後始革郎中坐法改御史

正德四年戶部郎中劉繹以公事罰運遼東米千石又賠補浥爛草束舉家囚繫本身杖比百日不能償上䟽哀懇乞充齋膳徒夫或炒鐵煎鹽下都察院查釋前罪降級外任送吏部尚書張綵言其素有才守改降監察御史清理兩浙鹽法因禍得福亦一時極異之典也

立中宮加恩內閣

萬曆六年立中宮王氏加恩輔臣少師張居正以守制不支祿故辭少保呂調陽進少傅尚書張四維進太子太保俱蔭一子中書舍人至七年居正服闋

進太傅加歲祿百石蔭一子尚寶司丞辭太傅六年以前中宮立無加恩故事蓋異典也

皇子生推恩內閣司禮

萬曆十年 皇第一子生恭妃王氏出也下 詔赦天下尊上兩宮徽號 仁聖懿安皇太后爲仁聖懿安康靜皇太后 慈聖昭文皇太后爲慈聖昭文明肅皇太后推 恩慈聖父武清伯李偉進封武清侯兄弟都指揮李文全指揮李文貴俱陞左都督千戶李文松陞指揮使俱給應得誥命 仁聖父固安伯陳景行歲加祿米一百石蔭二子俱錦衣衛百戶前

母莊皇后兄李鶴歲加祿米六十石又內閣輔臣張四維加少師吏部尚書中極殿大學士其太子太師如故申時行加少保戶部尚書武英殿大學士其太子太保如故各蔭一子尚寶司丞余有丁加太子太保文淵閣大學士其尚書如故蔭一子中書舍人俱各給應得誥命又司禮監馮保蔭弟姪都督僉事張宏蔭指揮使孫隆張鯨蔭指揮僉事何進李佑張朝蔭正千戶俱錦衣衛按 皇子生例不推恩徽號推恩止 皇親而已此異典也

邊功加恩內閣

正德五年寧夏平加恩內閣少師太子太師吏部尚書華蓋殿大學士李東陽加特進左柱國仍蔭子尚寶司丞少保太子太保吏部尚書武英殿大學士楊廷和少傅太子太傅仍蔭子中書舍人吏部尚書文淵閣大學士劉忠加少傅太子太傅武英殿大學士還各賞銀壹百兩紵絲四表裏太子少保吏部尚書文淵閣大學士梁儲改武英殿大學士邊功未有及內閣者有之自茲歲始八年以山東河南賊平內閣大學士李東陽楊廷和梁儲費宏各蔭子錦衣世襲正千戶辭乃詔東陽兼吏部尚書俸廷和加少師太子

太師華蓋殿大學士儲加少傅太子太傅謹身殿大學士宏加太子太保武英殿大學士已上二條蓋內臣欲大有封殖而以是餌閣臣也自是閣臣不與軍功者幾三十年至嘉靖十九年陝西大捷詔復夏言特進光祿大夫上柱國少師太子太師仍兼進吏部尚書華蓋殿大學士翟鑾加少保此則夏公以忤旨鑄秩急欲光復故也自是不已而議搜河套希大封拜得罪死三十年獲叛虜哈舟兒等輔臣嚴嵩陞子世蕃工部右侍郎仍蔭一子錦衣衛千戶東閣大學士李本進禮部尚書而撰文尚書徐階加少保蔭

卷之十二
一子入監公朱希忠加太子大師都督陸炳加太子
太保尚書孫承恩加太子少保此則贊玄例也三十
三年以拒虜功輔臣嚴嵩蔭子尚寶司丞徐階李本
蔭子中書舍人而伯陶仲文增祿百石公朱希忠都
督陸炳增祿五十石伯承裕加太子太保亦贊玄例
也自是復不與邊功者將二十年而爲隆慶以遼左
功輔臣高拱加柱國中極殿大學士張居正加少師
兼太子太師俱蔭一子錦衣衛千戶殷士儋加少保
與原輔臣趙貞吉俱蔭子中書舍人萬曆中數以遼
東戰功輔臣張居正呂調陽張四維加蔭賞從厚家

後居正遂自太傅進太師子錦衣衛指揮僉事 倚
陞同知世襲仍歲加祿米百石張四維加兼太子太
師蔭子錦衣所鎮撫世襲申時行加太子太保而極
矣十二年雲南大捷大學士時行加少師太子太師
中極殿大學士余有丁加少傅兼太子太傅建極殿
大學士許國加少保兼太子太保武英殿大學士

更定舊官

國初官制後革者記之以備考而人亦附焉
中書令不設左右丞相正一品平章政事從一品左
右丞正二品叅政從二品叅議正四品

上初下建康立中書省 上以中書省右丞相摠省事李善長宋思顏爲叅議李夢祥郭景祥爲左右司郎中侯原善楊原杲陶安阮弘道爲員外郎孔克仁陳養吾王愷爲都事王疇爲照磨樂鳳爲管勾夏煜韓子魯爲博士善長進叅政徐達爲右丞邵榮俞通海爲平章政事 上即吳王位善長爲右相國改左徐達爲左相國改右常遇春爲平章張昺楊憲爲叅政 上即大位善長爲左丞相達爲右丞相遇春爲平章軍國重事湯和廖永忠李伯昇李思齊王溥爲平章不治事汪廣洋自叅政爲左丞謫楊憲爲右丞

遷左丞誅汪廣洋再爲右丞相謫胡惟庸由叅政爲左丞進右丞相遷左丞相廣洋復爲左丞相汰平章叅政等官十三年惟庸族廣洋賜死罷中書省散其職六部尋置四輔官告太廟以耆儒王本杜祐龔敷爲春官杜敷趙民望吳源爲夏官敷之曰昔之耕莘者爲宰杜未安築巖者在朝君仁民康二臣繼出于殷商致君六百年之大業是賢者雖處同出異其忠君濟民之道則一朕今召爾等來朝命爲四輔官兼太子賓客位列公侯都督之次必欲德合天人均調四時以臻至治其敬慎之居三日復敕謂人主以一

身統御天下不可無輔臣而輔臣必擇乎正士堯舜
以得賢而昌辛以棄賢而亡卿等受斯重任宜體朕
懷心常格神行常履道佐理贊化以安生民且卿等
昨爲庶民今輔朕以掌民命出類拔萃顯揚先親天
人交慶於戲盛哉又十日敕本等曰自胡惟庸不法
之後特召天下賢才而有司又從泛舉尚書范敏獨
能薦卿等以輔朕朕視卿等皆高年篤厚故九月告
於太廟議立四輔以王本杜祐龔敷爲春官杜敷趙
民望吳源爲夏官惟秋冬官缺以本等攝之邇年自
春徂秋天災疊見維秋之暮天氣尚暄嘗諭本等沐

浴致齋精勤國務以均調四時本等奉命且誠逮立
冬朔風釀寒以成冬令嗚呼天其兆吉人乎感應之
機如響斯答古者三公四輔論道經邦理陰陽順四
時其或有乖戾則曰公輔失職蓋人事有不齊則天
應之有如此者卿等尚當竭忠誠以勤厥職庶幾感
格天心御集中又有與本等同游唱和詩多不載明
年命刑官議獄送四輔及諫院給事中覆覈無碍奏
行之有疑讞四輔官封駁之尋召左御史中丞安然
爲四輔官龔敷致仕復起爲國子司業尋以星變勅
諭王本等本尋坐法磔於市又明年罷不復設置太

宗正院改爲宗人府置宗人令左右宗人正左右宗人以秦晉燕周齊五王爲之俱正一品後存府以駙馬都尉領之置皇太子左右率府都督同知康茂才張興祖兼左右率府使副使顧時孫興祖同知王府事僉事吳禎耿秉文兼左右副使置諫議大夫以唐鐸爲之置諫院左右司諫以耆儒劉垓關賢爲之左右正言以耆儒趙肅何顯周爲之置執法議理司以前元工部尚書濂爲之乃李韓公之女弟壻也置審刑司左右審刑正六品左右詳議正七品凡大理寺平允法司囚犯皆得詳駁之置考功承勅司文三監

每監設令一人正六品丞二人從六品監察御史馬亮張迥等五十六人爲之命中書省兵部定給武官誥勅之制其特授陞除者大都督府同承勅監官以上旨附籍其初入仕者具年籍父祖已身功蹟其已入仕及陞除者具所歷功過年籍大都督府咨于中書省送兵部覆奏貼黃考功監叅攷同奏附籍部擬散官移文翰林院撰文付司文監校勘奏付中書舍人書寫署名用印轉付承勅考功二監并還本部以次署名用印齎赴省府臺官署名仍付司文監對同署名用印方付各部給授如襲職降用者大都督

府勘驗具年籍祖父功蹟降用者具其罪名奏 旨
處分承勅監官附籍具咨省送部覆奏貼黃叅攷對
同擬官撰文署名用印給授如前置平駁諸司命翰
林院編檢以下春坊司直以下贊讀考駁諸司奏故
如平允則署其銜曰翰林院兼平駁諸事某官某押
置磨勘司令以太子伴讀高暉爲之置內正司司正
一員正七品司副一員從七品專糾內臣之失儀者
尋改曰典禮司又改曰典禮紀察司陸正六品尋止
稱紀察司以李彬言等爲之置繩頑司令丞各一員
置稽疑司正一員正六品左右丞各一員從六品屬

官曰司筮無品署東宮通事司令一員從八品丞一
員正九品榮鉉鄭肅爲之署東宮文學趙晉爲之置
城門都尉一員以死事指揮劉廣子景爲之君子衛
居文官子姓舍人衛居武官子姓以指揮使李謙安
子忠領之置侍儀引進使正五品閣門使從五品以
故誠意伯劉基子仲璟爲之置尚賓大使儒學提舉
提舉司校理侍禮郎奉天門待詔俱革

易名而職如故或品有上下者樞密院爲大都督府
又爲中左右前後五軍都督府使知院從一品爲左
右都督陸正一品副使同知院正二品爲都督同知

正一品簽院從二品判官從三品今爲僉事正二品
上初下太平自稱太平興國翼大元帥下建康立天
興建康翼大元帥府廖永安爲大元帥常遇春尋爲
行中書省馬步水軍都督大元帥尋設江南行樞密
院湯和同僉院事徐達廖永安爲同知院事改院爲
大都督府朱文正爲大都督品如知院李善長兼府
司馬宋思顏兼叅軍後以李文忠湯和爲左都督馮
勝鄧愈爲右都督永樂以後五府職名如故而權悉
歸兵部矣有副使在僉事之上尋革復置大都督叅
議一員正三品戶部尚書樊思民爲之又置掌判官

品同叅議吏部尚書陳銘爲之五斷事司下各設稽
仁稽義稽禮稽智稽信今俱革而其職爲經歷都事
御史臺左右御史大夫從一品中丞正二品侍御史
從二品治書侍御史從三品治書侍御史正五品
上爲吳王始創臺以湯和鄧禹爲左右大夫劉基章
溢爲中丞文原吉爲治書安然爲中丞基實幹臺事
復省治書殿中不置而汪廣洋自左大夫入中書陳
寧代之安然爲右大夫中丞涂節告變而臺以中丞
爲長官安然任之後改爲都察院都御史僅七品御
史九品尋復陞正三品俄以左右都御史代大夫爲

正二品副都代中丞爲正三品僉都代侍御爲正四品與六部頡頏矣翰林院初設學士正三品講讀學士正四品直學士正五品待制從五品應舉正七品尋設學士承旨正三品學士從三品承旨則詹同宋濂爲之學士則陶安朱升爲之直學士陳桎范常爲之待制秦裕伯王禔爲之應奉趙震殷哲爲之後罷承旨直學士待制應奉不設而降學士爲正五品講讀學士爲從五品建文初改講讀學士爲文學博士方孝孺任之叅預機務如內相復置檢閱一員從九品

洪武末設華蓋殿謹身文華武英諸文淵東閣太學士俱正五品華蓋以劉仲質邵質文華以全思誠鮑恂余銓張長年武英以吳伯宗文淵以朱善宋訥東閣以吳沈爲之而無所領惟從容備顧問而已其後罷不設建文中革大學士止設學士而以謹身爲正心然亦竟無授官永樂始以胡廣楊榮金幼孜爲文淵閣大學士領閣務洪熙進楊士奇華蓋楊榮兼謹身黃淮金幼孜兼武英獨以光祿署丞權謹爲文華殿大學士無兼官亦不預閣務謹去後文華至今不設大學士得非以皇太子講讀之所故耶此殊不

可曉嘉靖末以華蓋殿爲中極殿護身殿爲建極殿
首以徐階袁煇充建極殿大學士而中極自隆慶初
始補李春芳

洪武初設弘文館學士不言品秩劉基危素陸稼胡
鏞王大中羅復仁爲之尋革至洪熙元年 章皇帝
復建弘文閣于思善門右以儲經史備顧問翰林學
士楊溥掌閣印 帝手授之侍讀王璉五經博士陳
繼吏科給事中王榮叅其事不久併閣務入文淵閣
溥亦辦文淵閣事

左右春坊大學士與正學士同品洪武中無任之者

當亦以爲衍耳建文以任董倫求樂立東宮李至剛
爲左解縉胡廣楊士奇因之解縉爲右黃淮因之洪
熙曾榮爲左王英爲右景泰商輅爲左彭時呂原倪
謙因之劉儼爲右劉定之因之逾五十年而弘治癸
亥會曲成以左坊學兼讀學遷中允楊廷和 上疑
而問之內閣具實對乃已廷和竟遷不設贊善大夫
正五品宋濂嘗爲之後止爲贊善從六品司直以下
亦不常設置將作卿正三品單安仁爲之後并入其
事工部而名尚存後改爲營繕正置司農卿正三品
楊思義爲之後入戶部置京畿都漕運使正四品專

治京師軍儲單安仁薛祥爲之置宣徽院使正三品
阮崇禮爲之後爲光祿司卿徐興祖爲之寂後爲光
祿寺從三品置大史院使正三品劉基爲之改院爲
監使爲令通判僉事各一員後爲司天監定爲欽天
監正五品有正副等官置回七監正副以下同欽天
監後革置醫藥提舉司改太醫院監正三品少監正四
品孫守貞爲之後改爲太醫院使正五品院判正六
品置滁陽牧監從三品後爲太僕寺置儀禮司正副
後爲鴻臚寺卿少卿置信寶提舉司從五品後爲尚
寶司正五品置營田使專董墾近畿田大都督府副

使康茂才爲之至嘉靖中設三都御史清屯尋革置
帳前總制親軍都指揮使馮國用國勝爲都指揮使
朱文忠康茂才爲左右副都指揮又置金吾侍衛軍
都護又置都鎮撫司孫養浩爲鎮撫又置 都尉
府正三品蓋即今錦衣旗手衛也又置兵馬司都指
揮使副都指揮等官後改文職降至六品而猶冒故
銜

初置江南行中書省以後平浙江湖廣江西河南山
東等處俱設行省其品秩一如內省惟不設丞相有
袁國公歐普祥者因僞漢故官而已後改行省爲布

政使司布政使視平章爲從二品左右叅政從三品
叅議從四品行樞密院爲都司都指揮使正二品同
知從二品僉事正三品初下太平興國翼大元帥李
善長爲都事潘庭堅爲教授汪廣洋爲令史下建康
諸路廖永安徐達常遇春湯和俞通海鄧愈邵榮耿
秉文爲大元帥後改翼爲衛置指揮使同知僉事等
官事實品祿如故置詹事院詹事則右都督馮勝領
同知則平章胡廷瑞廖永忠李伯昇領之副詹事則
左右丞趙庸王溥領之後併爲少詹事置諸王府左
右相各一員正二品左右傅各一員從二品以鄭九

成王克復汪河文原吉朱復爲相桂彥良熊鼎爲傅
而別設長史官爲正五品若相屬官者尋以耿秉文
吳良謝成等爲武相傅位居文臣上其後革相傅併
入長史見任者皆降秩五品而武相傅事亦入護衛
十八年命進士觀政六科承勅考功諸監者曰庶吉
士取庶常吉士之義也以楊靖沈潛等爲之二十八
年改六科給事中曰元士以見在人數正得八十一
也復改曰源士以政源所自出也

建文官制後革

建文元年更定官制六部尚書陞正一品增左右侍

中正二品侍郎如故省戶部十四司爲民部度支部
金帛部倉庾部刑部十四司爲詳憲部比議部職門
部都官部諸司俱去清吏二字都察院左右都御史
去左右二字後改御史府都御史爲御史大夫通政
司爲寺使爲鄉通政叅議爲少鄉丞增其屬左右補
闕拾遺各二員與大理寺鄉止稱通政大理鄉左右
寺正爲都評事副爲副都評事司務爲都典簿太常
光祿太僕鴻臚尚寶俱止稱鄉其少鄉丞分左右祠
祭署之稱天壇者曰南郊泗州者曰泗濱宿州者曰
新豐增鍾山祠祭署及司圃所光祿少鄉陞從四品

太僕增少鄉丞各一員及典廐典牧二署驢驘十五
群遂生三群分隸之詹事府詹事曰詹事鄉少詹事
曰少鄉增賓客二員增設資德院資德一員資善二
員其屬贊讀贊書著作郎各二員掌籍典簿各一員
國子監增司業爲二員省博士學正掌錄增助教爲
十七員翰林院增承旨一員文學博士一員省講讀
學士置文翰文史二館文翰設侍書革中書舍人職
歸之文史館修撰以下如故殿閣學士俱去大字謹
身殿大學爲正心殿學士六科省左右給事中五城
兵馬指揮曰兵馬副兵馬布政使陞爲正二品止一

員去左右字提刑按察司曰肅政按察司陞廣東監
課司爲都轉運鹽使司革五府斷事及稽仁稽義等
官親王府增賓輔二員正三品左右長史上增長史
一員正四品增伴講伴讀伴書各一員審理典膳奉
祀良醫典寶各正去正字郡王賓友二員正四品教
授一員記室二員直史一員左右史各一員吏目一
員典印典祠典禮三署各一員典饌典藥二署各二
員引禮舍人二員儀仗司吏目一員凡賓輔三伴賓
友教授進對侍坐稱名不稱臣至永樂初俱改正從
洪武之舊

更定勛階尚書曰特進資政上卿侍中曰資政卿二
品如之侍郎曰資政亞卿三品如之郎中曰資政中
大夫員外郎曰資政大夫給事中曰嘉政中士又遣
戶部左侍郎夏原吉給事中徐思勉等二十四人充
采訪使分巡天下問民疾苦旌廉斥貪得以便宜行
事

永樂官制

永樂初以北平爲北京置行部尚書二員侍郎四員
所屬吏戶禮兵刑工六曹郎中員外郎主事品秩如
京師而其職則布按二司也末年置六部始革置行

後軍都督府以代都司後置五府其事歸焉

弇山堂別集卷十二

弇山堂別集卷十三

吳郡王世貞元美著

皇明異典述八

召故相勅劄

我朝超用內閣大臣未有如張永嘉之篤者真所謂
家人父子也按嘉靖十五年致仕少師兼太子太師
吏部尚書華蓋殿大學士張孚敬表啟問安仍疏賀
冊嬪 上優詔答之遣錦衣衛副千戶劉昂視孚敬
于家賜之勅曰卿以內閣元輔朕所倚毗頃因有疾
懇乞歸休朕察卿有不獲已之情乃特俞允送鄉還

鄉茲得鄉來疏奏問并賀省覽之餘具悉忠愛特遣
錦衣衛副千戶劉昂齋勅往視鄉疾如既愈即便來
京勿負朕望果未除則當善自保攝用副朕眷思之
懷復以手勅付昂曰勅舊輔孚敬鄉比以疾乞還久
切朕思昨得奏賀朕躬平吉 聖母康泰及擇原選
淑女內曰曹王二氏朕御而各有喜期將近已先冊
封爲端昭二嬪并河南李氏京選王氏補爲敬靜二
嬪又朕於春三月躬行謁 陵禮奉 慈車率后妃
禮成後又于四月之吉命工恭飾新七陵增造等項
朕自作幽宮于 長陵左之陽翠嶺 即十道嶺更名改小山

一名平臺山以尊 皇祖太宗嘗御之地前次并往
金山拜 皇高祖妣章皇后 皇曾叔祖景皇帝二
陵奉 聖母舟回京今朕命使昂往視鄉於家鄉如
果疾未痊便不煩以見如小可即星夜以行急來見
朕副切思情勿自負自棄以致朕懷無已鄉其承之
致仕守正大臣勅諭

世宗初政群臣論薦大學士劉健謝遷戶部尚書韓
文皆以論劾逆瑾守正被害後雖復官而旌典不及
於是特遣行人齋勅謹錄之以見一時之盛

皇帝勅諭特進光祿大夫左柱國少師兼太子太師

吏部尚書華蓋殿大學士劉健朕惟人臣之事君得志行道樹功烈於當時者固難而名遂身退康寧壽考始終一節足以繫天下之望尤爲不易卿資稟醇正器識恢宏粵自早年究心理學上探河洛之傳登名賢科蜚聲藝苑勞勤懋著聞望彌隆遂以碩德長才受知於我 孝宗皇帝簡自聖心擢居政府朝夕獻替不詭不隨培植人才愛惜善類宣達民隱慎守彝章延訪于便殿賜問於平臺危言讜論裨益弘多是以致弘治十有八年之間政事清明實惟卿與二三大臣佐理之功至於顧命之際推誠付托至切至

專鄉感激知遇益切勞瘁故當

武宗皇帝改元之

初隨事納忠曲爲匡救其毅然不可回之氣往已形

於辭色釐革宿弊斥逐群小直道難容告老而歸高

風大節播在天下中遭權姦橫加讒抑旋復昭雪人

皆欽仰之不置乃今年近九旬體履康泰全名盛福

求之當代實鮮其倫惟昔宋之名賢如司馬光文彥

博輩皆鄉鄉哲揆其始終進退之大義抑亦不多讓

焉朕嗣承大統圖新治理顧茲尊賢優老之典誠不

可緩惟卿累朝舊德寔軫朕懷矧夫公論明揚至再

至三亦可見卿之賢於人遠矣茲特遣行人齎勅至

家存問仍賜羊酒命有司月餽官廩八石歲給糞隸
十名用表異數鄉其體朕至意願養天和茂膺壽祉
用表儀於天下非特鄉一鄉一邑之光而已朕又聞
老臣體國義不忘君鄉有嘉謨至計尚無所隱以輔
朕之不逮期於海內乂安共享太平之福而鄉亦有
令譽於無窮矣欽哉故諭時正德十六年之五月戊
午也

皇帝勅諭光祿大夫柱國少傅兼太子太傅禮部尚
書武英殿大學士謝遷朕惟人臣立朝得行其志建
功立業者固難而退處其鄉壽考康寧完名全節足

以繫天下之望尤爲不易鄉性資端方器識宏遠粵
自早年潛心正學遂以文章大魁天下蜚聲翰苑譽
望彌重逮 孝宗皇帝簡注有素爰自宮端擢居內
閣朝夕獻替不激不隨當時政化清美實惟鄉二三
大臣佐理之功暨聞末命付托諄切益感知遇誓竭
誠悃故當 武宗皇帝改元之初隨事納忠協心匡
弼釐革宿弊斥逐群小直道難容告老而歸高風大
節播在天下乃今年踰七袞體履安康子姓蕃茂全
德盛名求之前代亦不多見焉朕嗣承天序圖新治
理顧茲尊賢優老之典誠不可緩惟鄉累朝耆舊寔

軫朕懷茲遣行人齋勅存問仍賜羊酒命有司月餽
官廩八石歲給輿隸十名用表異數鄉其體朕至意
願養天和茂膺壽祉行將起鄉于家得聞猷告以輔
朕之不逮惟國有無窮之休而鄉亦有無窮之問矣
故諭

皇帝勅諭光祿大夫柱國太子太保戶部尚書韓文
卿以宏遠之才清慎之操敬歷中外多閱歲年晚貳
銓衡晉司邦計勞績茂著爲時名臣越在 先朝首
倡論劾除革群姦遭讒去官退居田里凜然風稜天
下想聞乃能懋修靡懈德望愈隆壽考康寧年踰八

袞完名盛福求諸今日蓋僅見焉朕初嗣位念鄉一
時耆碩人望攸歸已有 旨起用茲特先遣行人齋
勅存問并賜羊酒仍令有司月給食米四石歲撥人
夫六名以示優眷行將起鄉於家來觀闕廷以爲班
行之光鄉其願養天和益邵乃德康乃身用副朕寤
寐老成至意抑書有之曰爾身在外乃心罔不在王
室鄉有嘉猷嘉謀未展盡於平素者尚無所隱以裨
朕之不逮鄉其敬念之哉故諭時俱十六年六月之
壬子也是時劉公年八十九韓公年八十二謝亦七
十三矣韓以尚書得之尤爲異數後四年韓卒壽八

十六五年劉卒壽九十四七年謝復召明年復歸又
二年卒壽八十二自是王公整楊公一清劉公忠三
少傅皆有司援例爲請得慰諭存問而名壽俱不能
及也

致仕輔臣壽考恩典

以禮致仕內閣大學士八十尚書九十賜存問起自
嘉靖初載實帝王隆禮耆碩至典內閣大學士凡四
見而萬曆九年爲盛嘉靖元年少師大學士劉公健
九十河南左布政使閔楷等以聞 詔以健累朝舊
德禮宜優厚着本處巡撫都御史備綵幣羊酒親詣

其家宣諭眷念至意二十一年少保大學士毛公紀
八十山東撫按以聞 詔以紀輔弼舊臣年登八十
德壽竝懋其賜以羊酒撫按官及門存問仍月給食
米四石歲給人夫六名應役以示優眷二十二年大
學士賈詠八十守臣以聞 詔以詠耆舊重臣年躋
八袞齒德並茂其賜以羊酒命撫按官及門存問仍
月給米四石歲給人夫六名應役以示優眷盖毛公
以八年定禮削官及夫米後官雖復而夫米不復賈
公則致仕時原無給夫米故也萬曆十年少師大學
士徐公階八十大傅居正等爲請 詔以階輔佐

皇祖翼戴 先帝忠勤端亮茂著勞勛今年登八十足稱榮壽准卿等奏寫勅差官存問仍賜白金五十兩大紅紵絲蟒衣一襲綵段四表裏以示優禮耆碩至意賜勅一異也遣使二異也賜金帛三異也賜蟒衣四異也閣臣題請五異也不給夫米者先有故耳賜八十九十大臣勅諭

成化七年八月以南京吏部尚書致仕魏驥年九十
八特遣行人賜勅存問其辭曰鄉以醇篤之資正大之學歷事累朝官登八座歸安田里壽屆百齡進退從容體履康豫緬惟風采嘉歎不忘茲特遣行人賚

勅存問并賜羊酒令有司月給食米三石優贍終身
卿宜倍加調攝益隆壽祉佇聞讜論用慰渴思鄉其體朕至懷萬曆九年五月以少師太子太師吏部尚書建極殿大學士徐階八十遣行人賜勅諭存問曰朕聞古者公孤在朝則坐而論道更老在學則憲而乞言惟尊賢尚齒之儀寔褒德勸功之典曠言耆碩著有助庸世咸仰爲達尊朕豈靳於殊數鄉才優王佐學擅儒宗早馳譽於清華歷試功於盤錯簡知皇祖晉陟台司履忠順以事一人持廉靖而先百辟當儉壬之既黜更治化以維新懲貪污而仕路肅清

獎忠直而真材彙進申明典制多安邊裕國之籌默
運樞機有尊主庇民之畧定邦本于危疑之際宣
上德于彌留之中翼我先皇嗣基圖而撫方夏保
予冲子升儲貳以奉宗祧方倚重于黃扉遽乞間于
綠野後先多績朝廷資其典刑終始完名寰寓想其
風采自天純佑俾爾壽康屆茲八旬欽時五福匪直
先民之楷式寔惟盛世之禎祥朕祗適先猷追惟
舊德粵稽功載申賜寵章茲特遣行人涂時相齎勅
存問仍賜銀五十兩大紅紵絲蟒衣一襲綵幣四表
裏以示朕眷於戲衛武雖在耄勤箴儆不忘于國晉

公已解機務安危猶係其身惟我宗工不殊前哲其
茂綏蕃祉慎保修齡尚謀黃髮之詢用慰蒼生之望
欽哉

考滿非常恩賜

未樂中尚書凡三年滿有賜羊一牽酒十瓶鈔千貫
者九年滿有賜勅獎諭賜宴內殿者其後獎諭賜宴
惟內閣大臣一品九年滿有之而六年滿於羊酒鈔
錠之外又有加賜白金五十兩大紅麒麟段衣一襲
及酒饌一桌者則自張永嘉始夏貴溪嚴分宜徐華
亭俱有之張江陵九年滿於羊酒鈔錠外及銀兩表

裏俱以爲常賜復加賜白金二百兩坐蟒七衣各一
襲綵段八表裏陞左柱國太傅予三代誥命蔭子尚
寶司丞錫宴禮部辭太傅而已最後十二年滿上爲
召吏禮部傳諭元輔居正受元帝顧命夙夜在公任
事任怨雖稱十二年考滿實在閣辦事十五年忠勲
與常不同應得恩蔭等項着從厚會議來看尋遣司
禮監太監張誠賜銀三百兩蟒衣一襲紵絲四十表
裏羊十隻酒六十瓶鈔十萬貫酒飯五卓雞十隻鵝
五隻猪肉一百五十斤湯五品白麵一百二十斤香
油三百二十斤白糖一百斤黑糖一百四十斤蜜二

十五斤燭一百對柴三百扛蓮肉二十斤荔枝十斤
圓眼十斤膠棗紅棗各二十斤栗子三十斤冬筍二
十斤蔴菇香菌花椒胡椒各五斤尋勅諭元輔卿親
受先帝遺囑輔朕十年四海昇平四夷賓服實賴
卿匡弼之功精忠大勲朕言不能述官不能酬茲
歷十五年考績特於常典之外賜銀二百兩坐蟒七
衣各一襲歲加祿米二百石薄示褒眷先生其欽承
之該吏禮二部疏上加上柱國太傅支伯爵俸蔭子
尚寶司丞給四代誥命仍賜勅獎諭錫宴禮部疏辭
上柱國伯爵俸而已

勛臣致仕恩典

凡勛戚不任事即食祿奉朝請或以病免朝參未有致仕者正德中張英公懋乞骸特賜勅獎諭賜金幣輿卒二十人免朝給視輔臣恩禮有加可謂纓弁之極榮矣初朱成公希忠辭府事獎賜亦如之而加輿卒爲三十人仍舊知經筵及監修國史

中貴亦無致仕嘉靖中司禮監太監蕭敬張佐就閒敬賜歲夫十名佐夫五名月廩俱十石萬曆十三年司禮監太監張宏以病乞閒賜月廩二十石歲夫三十名尤重然命下之次日而卒

八十恩數

嘉靖三十八年正月少師大學士嚴嵩八十同官徐階等上聞詔苑直出入得乘肩輿歲支伯爵祿賜白金百兩綵幣八表裏寶鈔羊酒錫宴禮部其年六月諭禮部秉一真人恭誠伯陶仲文職掌玄教屢盡忠誠在告年踰八十其降勅遣錦衣衛千戶一人往存問賜白金一百兩綵幣四表裏寶鈔羊酒以示眷懷按二臣所邁殊爲隆渥特以名德不昌終從削奪故不足道也

嚴辭伯爵祿不許聽辭舊支正一品尚書二俸按

伯爵祿千二百石今定本色八百石每石折銀七錢折鈔四百石正一品俸千七十石尚書俸七百三十四石則當爲千八百四石矣是反奪其俸六百石也豈一二品俱止二分本色以是爲厚薄耶或前二俸不住支也

丁憂恩典

洪武中布政使魏鑑減哲徐中知府李亨丁憂家居俱念其居官勤慎各賜勅獎諭鑑哲賜米六十石鈔二十五錠中亨米五十石鈔二十錠仍令其恪恭以孝服滿來朝分理庶務爲生民福永樂末戶部尚

書夏原吉自繫所赦復職以母喪乞歸守制

仁廟慰諭之謂鄉有喪服我無喪服乎遂留贊輔

賜米十石鈔一萬錠胡椒一百斤遣家屬護喪歸兵部給驛舟有司治葬又楊庶子榮丁父憂奔喪

賜鈔千貫葬畢復任丁母憂以邊事留明年始奔喪復賜鈔千貫奉御宋成護行葬畢復任成化二年

李少保賢丁父憂賜賻如例奔喪賜素食品備途中用太監林興輔行十六年劉閣學吉丁父憂賜四表裏銀五十兩米十石鈔十塊羊四羴酒十瓶差少監送至其家正德十年楊少師廷和奔喪行人呂律

護送 賜勅書給驛禮部郎中祝鑾諭祭工部郎中
王孝忠治喪既抵家遣司禮監少監秦用催取萬曆
五年張少師居正聞父喪

上及 兩宮賜白金共一千五百兩鈔三萬貫綵幣
三十表裏白米六十石麻布百五十疋香油柴炭稱
是留輔政辭不許遣司禮監太監同子編修嗣修代
治喪禮部主事曹誥等官司祭葬請辭常祿許之仍
日給酒飯月給白米十石香油二百斤燭二百枝茶
三十斤鹽一百斤柴炭稱是 大婚後許奔喪 上
及 慈聖各賜白金五百兩綵幣八表裏 仁聖白

金三百兩綵幣六表裏瀕行賜白金八寶六十兩尚
寶少卿鄭欽錦衣指揮史繼書護送往回馳驛撫按
官以起程日期星夜馳奏既葬復命錦衣指揮翟汝
義敦召之限十日抵其地朝辭賜白金綵幣酒饌以
重其行服除賜白玉帶一條大紅坐蟒七衣各一襲
金執壺一把金臺盞一副 慈慶賜白金五十兩紵
絲四表裏 慈寧賜膳九品金執壺一把金臺盞一
副金箱牙筋一雙白金五十兩綵段四表裏葷素食
八盒甜食四盒酒十瓶仍設宴管待
十一年張少師四維聞父喪守制賜齋米八十一包

布十五筒鈔三千五百貫銀三百兩綵幣六表裏兩宮賜銀二百兩綵幣四表裏陞辭賜白金一百兩綵幣六表裏行人護行按蒲州賜比江陵僅三之一視他輔臣則倍屣矣嘉靖末呂少傅本丁母憂無所賜

大臣歿後儀典

洪武二年六月故征虜左副將軍中書平章軍國重事鄂國公常遇春卒於軍計聞上命禮部議舉哀喪至龍江上親出祭之勅葬鍾山之陰給明器九十事納之墓贈開平王謚忠武仍王其三代後中山武寧王卒禮如遇春益以二王爲開國諸功臣冠故

也自後內閣首輔卒於任者如贈太師楊士奇楊溥李賢彭時贈太保費宏太傅李時恩禮最號隆重然祭不過九壇齋糧麻布五十石疋而已萬曆十年六月故太師吏部尚書中極殿太學士張居正卒於位上賜齋壇麻布五十筒疋十疋米二百石香燭油薪稱是又與仁聖慈聖兩宮潞王共賻白金二千三百兩兩宮復賜齋糧米麻布二百疋香燭油薪有差祭九壇外加七壇大約視親王及國公之加師傅者贈上柱國謚文忠遣官會布政司營葬仍命京堂四品官錦衣堂上官各一員護喪其子編修

等辭謝疏 朕念先生承

先帝顧命鞠躬盡瘁歿而後已忠勞可憫他還有高
年之母在京着差司禮監太監陳政護送還鄉馳驛
前去然未幾奪其官并追一切恩典

居守賜勅

國朝六飛在狩必有居守如 文皇幸北京 皇太
子監國尚書蹇義金忠諭德楊士奇輔北伐虜 皇
太孫居守尚書夏原吉輔宣德征漢度人鄭王襄王
居守廣平侯袁容武安侯鄭亨都督山雲張昇尚書
黃淮黃福李友直輔正統己巳 上北征郟王居守

駙馬都尉尚書王直胡濙內閣學士陳循高穀輔此
皆重在居守諸臣無專勅正德 上南征寧庶人是
時無監國者內則司禮監太監蕭敬等太學士楊廷
和毛紀外則五府會昌侯孫銘等六部尚書陸完等
廠衛太監張銳等團營太監谷大用兵部尚書王瓊
等皆有勅是時權在中人故敕中人重而內閣輕嘉
靖 上幸承天 皇太子監國宣城伯衛鐸遂安伯
陳鏞留守太學士顧鼎臣尚書張瓚同留守是時
上注意內閣故顧有特勅爲重而諸大臣輕今按正
德內閣勅可攷者 皇帝勅諭大學士楊廷和等朕

今親統六師奉行天討勦除反逆以安宗社尚念根本重大居守無人一應合行事務恐致廢弛特命爾等照依內閣舊規同寅協恭勤慎供事每日司禮監發下在京在外各衙門題奏本俱要一七用心看詳擬旨封進奏請施行其奏有軍機緊急重大事情合用軍馬錢糧器械關防符驗之類尤要詳加審處擬旨封進聽司禮監一面奏聞定奪一面發各衙門依擬議處毋致遲滯誤事爾等受茲重托尤須盡心竭力維持公道不許徇私執拗如違責有所歸爾等其欽承之 皇帝勅諭少保太子太傅禮部尚書武英

殿大學士顧鼎臣朕茲巡幸承天府恭視 顯陵車駕往回動歷數月昨已冊立東宮命之監國特留鄉贊輔協同文武重臣居守內自禁掖外而都城遠及邊鄙并大小百司庶務悉以付卿卿宜遵承朕命應啟請者擬請令旨施行應聞奏者馳奏行在定奪其有密切緊重事情宜用欽賜印記來聞卿講幄重臣久懷經濟朕茲重寄宜欽承之

在京尚書都御史特勅

故事臣僚奉特旨者有勅若部院大臣拜命履任而已獨宣德中於兵部尚書許廓有勅謂前尚書張本

能體朕心上汲上於國事下倦上於兵民專意畢慮夙夜不懈刻弊舉廢各有條理其卒也朕念之不忘眷求賢能以繼其任爾廓久任於朝諳練政務特陞兵部尚書膺茲重寄惟秉忠瀝誠勤以蒞事庶以率下審察必明謀慮必固如政有不通弊有當革利有當建者毋憚面陳朕將擇而行之毋怠毋忽又勅都察院右都御史顧佐調爾佐副直庶正簡在朕心今特畀茲任其竭誠盡力必公必明恪恭夙夜毋憚勤勞彈劾愆謬毋避權要毋枉良善毋縱奸宄其各道見任御史宜審擇之凡庶謹公正老成醇厚者俱留

在職其不達政體不諳文移貪淫無耻及犯贓罪者悉送吏部降黜公差給假丁憂者亦如之務盡至公之道所闕御史郎行吏部慎選自今不許濫授爾其欽哉正德勅左都御史劉宇等令其持庶秉公正已率屬各道御史務令奉職守法清白自律夙夜匪懈一應政務悉依諸司職掌及憲綱施行言事必存大體治事必循舊章凡有章奏必先呈稟爾等指實奏聞黜幽陟明舊典具在仍行南京都察院一體施行嘉靖敕兵部左侍郎兼學士署掌都察院張璠調御史論事不知大體責人不究虛實望風捕影徃上失

真一倡衆和期於必勝巡按在外又不能正已律下
惟知以嚴勢加人激揚官屬則以喜怒爲取舍鞠問
刑獄則任已情爲出入如山西馬錄惑於朋言欲陷
一家無罪之人於死地勘官轉相附會釀成大獄一
省如此他處可知爾張璉宜宣揚朕意昭示各官痛
自懲創勉圖修省事君以不欺爲主律下以正已爲
先論事必明大體而抑細故論人必伸君子而抑小
人鞠獄惟平惟允勿憚五過之疵當官惟慎惟勤勿
忘三事之訓勿矯抗以要名勿偏私以玩法庶幾不
愧風紀之任不忝耳目之官仍行南京都察院一體

施行後列欵凡五條

洪熙特旌大臣三勅

勅太子少傅兼謹身殿大學士楊榮茲爲胡虜梗化
久犯邊疆我皇考太宗文皇帝爲宗社子孫天下
臣民長久之計不得已躬擐甲冑親率六師徃行天
討豈期醜虜畏威遠遁班師之際不幸皇考上賓
六軍在外朕又遠違膝下及斯崩殂兕孫亦莫能知
惟卿盡忠爲國報先皇帝恩德獨爲果斷致有今
日家國寧謐宗社奠安今辰奏告忽思至此實感不
已卿當重賚曩者哀悼倉皇之際報卿甚微今追前

勛加賜白金五十兩綵幣表裏各十寶鈔二萬貫白米二十石特陞鄉爲工部尚書前官如故三俸俱支全支尚書本色鄉當領受以慰朕懷又勅少師兼吏部尚書蹇義曩朕監國之時鄉以先朝舊臣擢兼詹事日侍左右時肇建兩京政務方殷隨事籌畫適中惟難鄉以善翊君以義殉國勞心焦思不遑身家載歷艱虞未嘗有咨嗟之意及朕嗣承大統贊襄治理用濟斯民喻朕於道不懈益恭二十餘年夷險一節朕篤不忘茲以已意創製蹇忠貞印一枚賜鄉歲於家傳之後世俾爾子孫知前人顯榮於國者良不易

致宜加保守朕之子孫亦知鄉弼予於艱體朕愛鄉之心以保爾子孫庶幾上下相安與國咸休書曰惟后非賢不乂惟賢非后不食自古君臣相遇難矣往績惟茂永終是圖欽哉又勅少傅兵部尚書兼華蓋殿大學士楊士奇往者國家肇建兩京政務方殷朕膺監國之命鄉以翰林親臣兼職春坊留侍左右贊助庶務敷答章奏籌畫之際適中惟艱朕恒以爲慮尚賴鄉一二臣僚合心同德徇國忘身屢歷艱虞曾不易志及朕嗣位以來嘉謀嘉猷入告於內期予於治以憂黎元正固無二簡在朕心茲以已意創製楊

貞一印一枚賜卿用藏於家傳之後世庶卿子孫由是知卿克致顯榮不易惟難思保守之惟朕子孫亦由是知卿弼朕之功以保全爾子孫與國咸休與世無斃詩曰無言不酬無德不報又曰靡不有初鮮克有終尚克交修以成明良之譽欽哉按此皆洪熙元年所賜者前一勅報榆木功後二勅報監國功其精切懇至當非後世可擬故特志之

太后還宮賜勅

今上將大婚

慈聖太后還慈寧宮特以上付托少師張居正仍

賜坐蟒七衣各一襲綵段八表裏白金二百兩其勅

辭云

皇帝大婚禮在邇我當還本宮不得如前時常七守着看管恐

皇帝不似前向學勤政有累聖德爲此深慮先生親受

先帝付托有師保之責比別不同今特申諭交與先生務要朝夕納誨以輔其德用終

先帝付托重義庶社稷蒼生永有賴焉先生其敬承之故諭外賜坐蟒七衣各一襲綵段八表裏銀二

百兩示倦也懇切至意

賜勅獎言事

高廟以右司諫石時中左判祿夏守中言事各賜鈔十錠巡按陝西御史凌漢言事賜其子鈔二百錠綺衣一襲

文廟以鎮守湖廣總兵官鎮遠候顧成言事賜鈔五千貫文綺帛八疋絲絹八疋再以言事賜鈔一萬貫銀二百兩綺絹如前又以軍人張貞言事賜鈔千貫帛衣一襲

仁廟以大學士楊士奇言事賜白米十石絲幣二表

裏鈔二千貫又以學士楊溥言事賜綵幣一雙鈔千貫二公及鎮遠皆有勅獎諭

若洪武中超擢典史馮堅衛經歷黃福邊彝又擢祁門知縣何敏中爲徽州知府則皆以小臣言事者也嘉靖中刑科都給事中高時劾翊國公勛加俸一級御史鄒應龍劾少師嵩陞通政司右叅議右中允趙貞吉以論兵陞右諭德

手勅問大臣疾

洪武十八年太傅魏國公徐達瘡愈帝賜勅曰方今九夷八蠻大者畏力小者懷德非將軍忠誠耿也

以勞爲逸何由臻茲將軍功昭上下澤及兵農而於人歆之私秋毫無犯此其明智者乎邇者將軍有瘡疾朕初聞之於心恐焉今喜疾愈特遣將軍子持至意將軍其悅且安故勞 正統七年少師兵部尚書華蓋殿大學士楊士奇有疾又以子稷犯法在告帝賜勅曰卿歷事 祖宗以及朕躬故沃弼贊勞勛寔多比卿以疾違朕者數月朕心拳匕惟卿子乖家訓干國紀朕不敢私卿其以理_自勉進藥食早圖康復以副注望 景泰六年少保太子太傅兵部尚書于謙有疾 帝賜勅曰昨聞卿偶膺重疾朕心惕然

念卿夙膺重托旦夕不可或無已令近臣攜醫往視茲復賜卿白金五十兩爲湯藥費并賜竿酒白米卿其勉扶病體副朕愧匕之意 嘉靖十三年少師太師吏部尚書華蓋殿大學士張孚敬有疾 上手扎諭昨少保時特爲卿陳病苦之情朕惟近古之君有剪鬚療其臣之疾者今朕每自取數味合以飲或時亦効茲手揀數味清心寧神驅火保肺之藥爲一服卿亦如常煎而服之服時用蜜一大茶匙倘得病減庶慰朕念雖非剪鬚者之切亦見朕意服後一二日可告朕何如四十四年少師太子太師吏部尚書建

極殿大學士徐階有疾 上遣御醫徐備視疾中涓
賜猪羊甜醬瓜茄酒米如例已復出尚方珍劑二甌
命司禮貴臣王本齋手札諭公痰火一疾惟須自慎
既不可用寒劑又不宜名降火又有謂痰隨氣降此
非治法也但仍以涼平性品用之便消順耳又青州
白丸子直者亦効非其本地合者無益至於牽扯背
肩痛當以祛風順氣之劑間服之亦少資云 萬曆
十年諭太師張太嶽朕自冲齡登極賴先生啟沃佐
理心無所不盡迄今十載四海昇平朕垂拱受成先
生真足以光 先帝顧命朕方切未賴先生屢次辭

忍離朕耶朕知先生竭力國事致此勞瘁然不妨在
京調理閣務且總大綱着次輔協理先生專養精神
省思慮自然康復慰朕朝夕倦匕至意按大臣有疾
賜米及鮮猪醬瓜茄遣醫診視此恒典也徐揚于三
公獲勅諭已爲優禮而永嘉華亭獨拜手和之藥辭
旨睽匕踰於骨肉江陵至以三公署別號稱先生真
殊典哉特非上意耳

行人勅免真人朝

嘉靖十七年 皇帝勅諭正一嗣教大真人張彥頤
朕惟我 皇祖之制天下大小衙門官員凡三歲一

朝覲鄉亦在與焉重其教也今年又當其期朕念鄉
晚年方得一子矧在襁褓或難遠離特遣行人黃如
桂往諭今次特暫免鄉一來俾鄉得專守視見朕保
重爾嗣之意鄉其欽承之哉故諭按免朝傳奉一旨
足矣今至屢勅諭遣行人稱鄉而恤其子幼即勲戚
宰輔所不能及也亦異矣

勅獎郡邑下僚

洪武中勞緣事丹徒知縣胡孟通縣丞郭伯高廣德
州知州楊翰金壇縣丞李思進俱留復任爲耆老奏
保也勞建陽知縣郭伯大縣丞陸鎰伯大陸泉州府

同知鎰福州通判勞盱眙知縣方素易陞金華府知
府以政績也勞常熟知縣成萬奇以執府悍吏也勞
崇德知縣畢輝縣丞齊搏以治奸頑也勞蘇州府知
府王觀以搥死奸吏也勞平陽知縣張礎以具奏金
鄉衛官也已上俱遣行人勞宜興主簿王復春仍陞
常州府同知已上遣吏科庶吉士楊靖皆有 勅諭
上尊之賜礎加鈔三十錠素易有鈔錠幣帛勞景東
府知府俄陶以不從亂也有 勅諭仍賜白金五百
兩文綺二十疋永樂中 賜勅獎汶上知縣史誠
上賜織金紗衣一襲鈔千貫仍陞濟寧知州掌縣事

以縣事治也昌樂縣丞于子仁以緣事奏保賜金幣
陞知縣後復以緣事奏保賜金幣陞知府尤為異常
賜勅褒致仕官

高皇帝 勅諭秦府致仕左長史文原吉謂其昔在
秦府終其任而國賴以安民樂田里一旦致政而歸
國凶而民擾所以然者由群小儉邪導其為非於是
忠良奸宄昭然可見使朕念卿夙夜不忘特遣中使
賚白金二錠楮幣百錠文綺帛三十疋賜卿以養
年至可領之原吉初以治書侍御史執政遷秦左相
秩正二品後罷相以左長史行相事秩五品而致事

後恩禮同宰輔大臣固不以品秩高下為軒輊也

賜夫人勅

洪武二十一年賜信國公湯和夫人胡氏黃金二百
兩白金一千兩鈔五百錠綵段三十表裏仍 賜勅
曰婦之道專內政而無妬勤勞啟家夫婦同心若此
古有之今之人少見惟朕臣湯和與爾夫人同朕鄉
里當天下大亂之時人各挈家避難皈依豪雄所在
如之獨爾信國立勛業於大廷今也功成名遂携長
幼而歸故鄉嗚呼昔爾夫婦墨髮而來今歸故鄉皆
蒼顏皓首夫人淑德命婦如之鮮矣特賜助和之功

敬家之勞如數夫人頌之未樂八年遣行人余昺勅涼州都督吳允誠妻曰北韃寇以兵脅爾夫妻爲叛爾夫及子從朕征討而爾能守節勵志與子管者謀執叛者戮之以婦人而秉丈夫之節忠以報國智以脫患朕甚嘉焉今賜爾綵幣十表襲米百石鈔四千貫羊百羖用示褒嘉

弇山堂別集卷十三

弇山堂別集卷十四

吳郡王世貞元美著

皇明異典述九

天子賜名

高帝時靖江王鐵柱賜名熾再賜名守讓鄧衛公友德賜名愈李曹公保兒賜名文忠楊左丞羣賜名憲陳御史大夫亮賜名寧江陰吳侯初爲指揮名國興賜名良魏國公徐允恭旣嗣爵賜名輝祖及諸弟增壽添福膺緒皆賜名又賜署令汪名文蹇忠定初名瑤帝親書義字賜之齊尚書初名德賜名泰鐵尚

書鉉以都督斷事奏對稱旨

上為字之曰鼎石胡文穆初名廣 建文君易之曰

靖後

文皇命仍故名永樂時楊文敏子榮入閣

上為改之曰榮故魏國公徐輝祖子釋迦保讓爵特

賜名欽李狀元初名馬開榜日

上親書其字於旁遂名騏河南護衛軍俺三發周王

反謀陸錦衣指揮僉事賜姓名趙誠洪熙元年

賜魏國公徐長孫名顯宗夏太常相既第入中秘

宣廟一日視其名曰日可從旁乎改置上曰景王毅

愍初名強改賜曰文沐黔公初名儼改賜曰斌成化

中有虜患 上改布政使胡德勝名曰德盛會昌侯

孫鎮以名犯 英廟諱 上為改曰銘 世宗朝少

傅張文忠璫以嫌名請 上為改曰孚敬仍賜字曰

茂恭恭誠伯陶仲文 上為字曰載道賜號曰林隱

又曰凌虛子

賜國姓

太祖有義子數人如李曹國文忠沐西平英都督何

文輝徐司馬及元帥文剛文遜等皆賜朱姓正德五

年義子武德一姓七年都督錢寧錢安許國賜朱姓

又賜都督朱福朱副都指揮朱謙朱春朱翥朱增朱
斌朱政朱海朱岳朱昇朱晟朱彪朱鏞朱鈞指揮朱
欽等千百戶鎮撫旗舍朱欽等百二十人姓十二年
賜舍人朱山朱準朱容朱淮朱渭朱義朱大爵朱印
朱珂姓俱錦衣衛食糧尋詔都督江彬許泰劉暉張
洪神周李琮指揮焦睿俱賜朱姓又改指揮楊瑄曰
璋焦椿曰棕桂曰松張天祐曰海廷鸞曰璧馬定曰
靖俱賜朱姓

賜降虜姓名

賜降虜姓名忠勤伯丑驢曰李賢同安侯火里火真

曰火真順義伯阿魯哥失里曰羅秉忠恭順伯把都
帖木兒曰吳允誠忠勇王也先土干曰金忠安順侯
脫火赤曰薛貴末順伯脫懽曰薛斌清平侯買驢曰
吳誠忠勇伯把台曰蔣信子也兒孛思曰蔣善恭順
侯也都帖木兒曰吳克忠都督都指揮指揮等官麻
子帖木兒曰王麒完者帖木兒曰吳良論都兒灰曰
柴秉誠把敦杭曰吳守義曲倫台曰夏貴北斗曰戚
斌觀音保曰李觀把住曰楊効誠朶兒只曰馬惟良
鐵柱曰柴克恭滿束兒灰曰柴志誠脫七孛羅曰脫
順又脫七索羅曰和愛阿兒刺台曰楊汝誠伯帖木

兕曰柴志敬猛哥曰安汝敬脫七曰楊必敬只蘭曰
吳克誠朶列干曰吳存敬克羅俄領占曰羅秉忠火
失谷曰韓以譏白斗奴曰白忠阿的納曰王義阿刺
帖木兕曰穆義頂住驢曰丁順季百家奴曰季安祖
住不花曰柴永譏額里孛羅曰高禮那罕赤曰莫清
把秃曰趙忠羨伯容帖木兕曰宋一誠哈刺你敦曰
張隆善演只不花曰王懋忠撒兒桃曰劉允信釋家
奴曰李顯忠答卜曰張志義阿刺失曰李從善可捏
曰郭以誠苦木帖木兕曰柴永正達冊曰安汝堅把
的曰平以正迷南失加曰安思譏乃馬反曰王存禮

阿討刺曰曰瑜恰恰曰陳守忠皮兕馬黑麻曰馬克
順伯顏達里曰于忠那海曰海榮五十六曰陸忠丑
丑曰田義虎三曰王彪黑漢曰陳玄伯家驢曰白毅
饒五十曰姚智友都曰郭羨牙失納曰芮剛採住兕
曰朱採脫火赤曰朱靜瀚即兕曰朱滿都忽曰朱息
卜刁罕曰朱窺又編修火你赤曰霍丘

賜免死詔

文臣非封侯伯給券而有身免二死或一死詔者

太宗於光祿鄉張泌

仁宗於光祿少鄉李灝此可據者也灝免三死內臣

如金英范弘輩俱有之據小說云蹇夏二楊皆有賜不可攷矣

親譔祭文

高皇帝諭祭群臣文多出御筆或有所感觸即爲之然不以示恩禮也若繼體之世有之則曠特矣嘉靖中上爲少保禮部席尚書太子太保兵部李尚書承勛親御翰墨作祭文皆極諄懇示不及入相及拜太宰意

賜群臣詩

高帝聖質天縱其賜群臣詩文不以貴近觸意即黷

多不可紀若承平之世人主所賜內閣元老及禁林侍臣亦多若尤異而可紀者

宣宗賜少傅工部尚書兼謹身殿大學士楊榮詩武夷巍峩青挿天丹山碧水相連延扶輿旁礪之所產往昔奮起多名賢只合繼續揚華芬漢清白吏有遠孫明經策第多詞垣皇祖承天御天下竭職論思靡餘暇懷忠秉誠履堅貞臨事果達智識明禁中頗牧才卓犖風雲驥足千里輕顧予非德忝嗣位旰食宵衣急圖治普天之下率土之濱安危休戚翳余一人大厦之興藉梁棟爲邦必資輔弼重卿事

太宗兼仁考歷年固多身未老方茲倚重傳與保士
有大抱負堯舜其君民勗哉弼違補闕輔吾仁齊芳
昔賢輝千春 世宗賜少師太子太師吏部尚書謹
身殿大學士費宏古昔賢王勤聖賢必資賢摅爲股
肱君臣上下俱一德庶政惟和洪業成顧余眇末德
寡昧欽承 眷命曆數膺宵旰兢 勉圖治日御經
幄延儒英每從古訓尋治理歌詠研磨陶性情詩成
朕意或未愜中侍傳宣出紫清補袞卿佐仲山甫爲
朕藻潤皆精明睠茲忠良一以賴舜臯彷彿康哉賡
朕所望者獨卿重廟堂論道迓熙平虞廷盛治頌百

揆商諮伊傳周兩卿朕續大服履昌運天休滋至卿
其承 帝賚良弼匡吾政協恭左右持鈞衡大旱涸
鄉作霖雨淫潦亦賴旋開晴沃心輔德期匪懈未讓
前賢專令名 右皆七言歌行又賜少師太子太傅
吏部尚書武英殿大學士楊一清邇年西陲擾起卿
督邊方三辭乃承命開心副予望才兼文與武內外
資安攘寬朕西顧憂遂使吾民康公勤既昭著夙名
滿華羗勅使往宣召復來坐巘廊黃扉典政本摠誠
以匡襄余奉 祖宗緒志欲宣重光深恐德弗類倚
毘賴卿良展其平生志佐朕張 皇綱股肱職補袞

伊周竝昭彰助成嘉靖治青史常流芳又賜太子太
保吏部尚書武英殿大學士石珪黃閣古政府輔導
須才良朕自卽祚始求賢日皇七卿以廷薦入性資
特剛方在木類松栢在玉如珪璋可否每獻替忠實
無他賜聖學朕所勉煥乎慕堯章機暇有詩作忠懷
庶宣揚賴卿善補袞繪繡衣與裳竭誠乃賡載彩鳳
鳴高岡化成在人文熙皞期虞唐地天旣交泰民物
咸平康述此酬卿勞盛事傳無疆賜太子太保禮部
尚書武英殿大學士賈詠殿廷暑氣薄薰風灑然生
萬幾有清暇書史陶吾情日與聖賢伍外誘難相嬰

對時或感物興到句還成豁然融心性豈止諧音聲
資卿爲藻潤朕志益開明卿本中州俊簡在登台衡
君臣際良難所貴德業并詩章本餘事治理須持平
朕固諒卿志夙夜懷忠貞喜起協舜樂交修和商羹
卷阿有遺響終聽鳳凰鳴又求樂五年授交趾明經
其潤祖等十一人爲諒江等府同知賜勅慰勉仍賦
詩一章各送之宣德五年命行在工部左侍郎許廓
巡撫河南仍賜之詩曰河南百州縣七郡所分治前
歲農事缺始旱澇復繼衣食旣無資民生曷由遂顧
予位民上日夕懷憂愧爾有敦厚資其往勤撫字徒

者必綏輯饑者必賑濟咨詢必周歷毋憚躬勞勤虛
文徒瑣碎所至見實惠勉旃罄乃誠度用副予意又
命陽武侯薛祿等率師築赤城等處賜之詩有出車
命南仲城齊維山甫句祿不曉南仲山甫以問少傅
楊士竒具言之且曰 上以古之賢將待爾也祿乃
拊心感泣又 肅廟以禮部尚書席書病目賜詩問
之期以弼亮以刑部尚書趙鑑致仕賜詩送之嘉其
止足皆龍箋御墨 天書煥爛真傳家之至寶耀世
之盛事也又 宣宗賜太醫院使徐叔拱省墓雲間
秀毓人中英襟懷磊落水壺清群書博覽析理明青

囊金匱尤研精濟人利物心秉誠江南江北馳芳聲
峨冠博帶屬老成軺車應召來我京醫人醫國咸見
稱回生起死知通靈掄材特授官品榮蒼顏皓首延
遐齡錫爾鳳誥彰爾能追封仍顯爾所生竭來孝思
攄衷情懇告祭奠歸先塋朔風獵 征帆輕長江萬
里烟波平故鄉晝錦光熒 壺觴親舊歡相迎私恩
公義當並行北轅宜早登回程而全忠孝惟在鄉汗
簡千載留清名又賜還鄉太醫老鄉八十餘胸蟠千
古岐黃書鬢含白雪面紅玉長紆錦綬鳴璫琚光華
近侍今三朝致恭和保功業高五花鸞誥寵先世南

望飛雲心孔勞歸榮遂爾追遠情吳松江水清冷七
春風花開景明麗待爾重来朝闕廷

右叔拱以供奉庶僚得此其獎予期注之隆有公
卿大臣所不敢望者叔拱歸鄉時 天子賜二宮
人二小璫使扶侍朝夕後從塋於墓所尤爲異典
余與叔拱之後益孫善出家乘見示後攷之 宣
廟御集邑志皆合因錄於此

勝國臣特旌

自古忠臣殉國亦有幸見旌於新朝者如堯君素劉
仁贍之類要亦創業之主欲以風厲後代偶一爲之

而已然未有我 明之於御史大夫福壽者

高帝下建業福壽以城破戰歿非若君素仁贍之百
折不撓也 高帝略其吠堯錫以崇祠著之祀典與

開國元勛並列其平章政事與衛國公之位號忠肅
之謚一仍元舊不少貶損有子陳讓福仕爲中書宣
使遷海州同知坐法當戍邊 上曰是福壽子忠臣

之後耶宥之擢爲太僕少卿賜鈔百錠後二年擢兩
浙都轉運鹽使復坐爲宣使時與胡丞相黨事旣坐
減戍雲南矣 上復曰此故元忠臣子改命於西平

侯沐英處聽用仍勅侯善遇之噫可謂幸矣彼慶童

也先帖木兒陳友定者獨非忠臣也耶

上自取江東以至即位每遣使賫幣問候元大將擴廓帖木兒即王保保輒被留後雖定天下而保七遁沙漠數犯邊 上猶冊其妹爲秦王妃冊文稱太傅中書右丞相河南王保七之妹洪武八年保七卒始冊衛國公鄧愈女爲次妃

賞功異典

國朝大功無過於取元都定中原而立功之臣無過魏公達鄂公遇春然前賞止白金五百兩文幣十表裏後賞止文幣一百表裏而已豈其時庫藏尚未充

足耶獨二十一年捕魚兒海之捷大將軍永昌侯玉賞銀二千兩文綺五十疋鈔一千錠左叅將定遠侯王弼白金一千兩鈔八百錠文綺四十疋左右副將軍延安侯康勝宗武英侯郭英白金各一千兩鈔四百錠文綺二十疋右叅將都督孫恪白金五百兩鈔三百錠文綺十五疋乃至部卒以獲寶功百戶池裕賞黃金一百兩白金三百兩綵段六表裏揔旗施文等各賞黃金一百兩綵段二表裏各進官四級二十三年平九溪諸峒擒賊首夏得忠功靖寧侯葉昇賜黃金二百兩白金三千兩鈔一千錠文綺三十疋普

定侯陳恒東川侯胡海等次之九溪之功又下於捕魚兕海矣而賞若此所不可曉也

初平安南英國公張輔賜冠服白金四百兩鈔一千錠綵幣四十表裏黔國公沐晟冠服白金鈔同幣殺其二豐城侯李彬等有差再下安南功張輔沐晟各賜白金五百兩鈔二萬錠綵幣五十表裏正德五年太監張永以平安化發劉瑾功賞白金五百兩綵幣三十表裏此繼世以後賞功之極盛者也

國朝黃金不以賞功而自葉昇池裕外正統中三殿工完賞太監阮安曾保各金五十兩銀一百兩綵段

八表裏鈔一萬貫景泰中以叅將楊俊獲喜寧功并揔兵官朱謙各賞金三十兩銀六十兩加賞俊金二十兩銀三十兩綵幣三表裏又以立東宮賞大學士陳循高穀江淵蕭鎡商輅各黃金五十兩賜黃金凡五見

勛臣歸鄉賞賜

洪武二十一年信國公湯和還鄉賜黃金三百兩白金二千兩鈔三千錠綵段四十表裏又賜其夫人胡氏黃金二百兩白金一千兩鈔五百錠綵段三十表裏二十三年魏國公徐輝祖開國公常昇曹國公李

景隆宋國公馮勝申國公鄧鎮穎國公傅友德還鄉
各賜黃金三百兩白金二千兩鈔三千錠文綺三十
疋綾疋疋明年涼國公藍玉賜如之加鈔五百錠江
夏長興永平南雄崇山懷遠鳳翔定遠安慶武定鞏
昌鶴慶東川靖寧宣寧普定景川諸侯俱黃金二百
兩白金二千兩鈔千錠文綺三十疋西平侯沐英來
朝賜黃金二百兩白金五千兩鈔五千錠文綺一百
疋按鈔一錠爲五貫貫直白金一兩五千錠則爲白
金二萬五千兩

賞告密功

洪武太原衛軍林旺韓五兒以發劉原利叛陞百戶
各賞白金三斤文綺帛十六疋千戶張豫蒞莊成黨
迭賞白金二百兩鈔四百錠衣一襲良馬金帶一陞
陝西都指揮加賞白金二百兩鈔二百錠絲段十表
裏牛馬各六疋樂摠旗靖西京駙告叛陞百戶白金
各五十兩鈔百錠絲幣二表裏衣一襲寧夏都指揮
韓成預言叛虜謀賞鈔二百錠羊十羴酒五十瓶百
戶王紋蒞歷城侯盛庸罪陞指揮同知賞銀一百兩
鈔四百錠都督許成蒞譚深趙誠謀殺梅殷封永新
伯其後御史李濬告漢王反不過轉僉都御史而蕭

淮等族寧王謀僅一轉光祿少卿又不足言矣

軍民一事之賞

高帝不測之賞雖戍卒田父一善所不遺如民人王竹遺書誨其子平涼知縣瑱以廉儉事聞赦瑱它罪賜白金百兩川椒附子各五斤仍賜勅獎諭蓋以竹家書要二藥令其起稅寄來故也又以軍人王二隨征獲馬入官賞白金百五十兩鈔五十錠民蔣公王剛甫獲蘭秀山盜各賞白金一百二十兩黃再文獲長陽盜賞白金一百五十兩軍章不花執僞右丞燕海雅賞白金三百兩

尚師之賞

永樂初尚師哈立麻初見賜黃金百兩白金千五百兩鈔二萬貫綵幣四十五表裏及法器裊褥鞍馬香果米茶等物徒衆白金綵幣靈谷寺爲

高皇帝后資福事竣賜黃金百兩白金千兩鈔二千錠綵幣百二十表裏馬九疋灌頂大國師哈思已囉等各白金二百兩鈔二百錠綵幣馬三疋五臺山爲仁孝皇后資福事竣賜白金一千兩綵紗羅絹布二百六十疋

真人之賞

嘉靖前後賜真人陶仲文銀十餘萬兩大紅金綵繡
織蟒龍斗牛雲鶴麒麟飛魚孔雀段羅紗絹無慮數
百襲獅蠻玉帶白玉帶五圍金帶一圍玉印二金嵌
寶冠渾金冠纍絲冠如意七寶簪金嵌寶石金銀水
盃金盤銀盤各十餘副

諸降虜重賞

諸降虜之賞無重於洪武之納哈出朮樂之金忠者
納哈出封海西侯賜玉帶一金相香帶一白金一千
兩文綺帛各四十疋鈔一千貫又加賜文綺帛各十
疋白金二百五十兩錦衣一襲妻子衣靴襪線米五

百石宗王平章國公觀童等十人各文綺帛二疋銀
二十五兩諸部將金帶一百花素銀帶七百紗帽八
百銀鈔有差又發鈔三十萬錠織金文綺二千疋布
十七萬六千七百十六疋綿襖二萬七千五百五十
二領冬衣各色絹衣三萬二千二百四十襲也先土
干郎金忠封忠勇王賜金印朝服公服玉帶織金文
綺衣黃金一百兩白金四百兩鈔二千錠紵絲五十
表裏紗羅綾各二十疋鞍馬二疋副牛百頭羊百頭
居第牀褥器用薪芻咸備別賜妻黃金五十兩白金
百兩紵絲二十表裏紗羅綾各十疋鈔一千錠冠服

一副女衣一襲其甥都督把台并都指揮察上等八員各白金五十兩鈔七百錠織金文綺衣一襲紵絲六表裏布三十疋指揮卜峇帖木兒等三十一員各白金三十兩鈔五百錠織金文綺衣一襲紵絲五表裏棉布二十五疋千戶昂克土列等十八員各白金二十兩鈔四百錠織金文綺衣一襲紵絲四表裏棉布二十疋百戶所鎮撫格干帖木兒二十五員各白金十兩織錦文綺衣一襲紵絲三表裏棉布十五疋冠帶鞍馬牛羊薪芻居室器皿照等第給賜
北虜之賞

賜北虜之厚無過於正統時瓦剌不花王太師也先者蓋其時虜勢方盛故也按四年賜脫七不花王可汗織金四爪蟒龍膝襪八寶衣一織金胸背麒麟青紅絲段六五色段八絹二十五金嵌寶石絨氈帽一串頂金嵌大鵬厭縷事件金伽藍香間珊瑚帽珠一串寶金絲繡紵絲衣六金繡纏身蟒龍直領一青暗花井口對襟曳撒一織金胸背麒麟并四寶四季花裕襖比甲各一織金虎弁圈金寶相花雲肩通袖膝襪各一金相犀甲麒麟繫腰一紅甸皮描金花包臧銀摺鐵刀并鞘一銅綿虎尾三尖雲頭套靴一雙秋水

面烏木裹琵琶一花梨木火撥思一鞭鼓喇吧號笛
各一黃身勇字魚肚旗一魚尾號帶飛虎招旗二妃
及承相去院大夫以下各有差賜淮王也先如可汗
自是歲七有加十四年賜可汗織金蟒龍文綺綵絹
一百八十四疋金銀各五錠塔納珠一千六百顆金
銀相木碗各二織金九龍蟒龍渾金文綺三十八疋
繡金衣五件靴襪樂器帳房藥材等物可汗二妃織
金文綺綵絹三十二疋各錦袍一襲織金衣三件靴
襪針線脂粉絲絨圍金賜也先亦如之未幾而有土
木之變尚賜可汗及也先各金百兩銀二百兩托珠

十托珍珠百顆織衣九龍紵絲五疋織金蟒龍紵絲
五疋織金胸背紵絲十疋渾織金花紵絲五疋素花
紵絲二十疋并琵琶箏胡琴器皿等物未幾 太上
還可汗爲也先所滅賞却從薄矣

戎王來朝之賞

末樂破安南之後西南夷王來朝者凡四五見 國
家亦以其近世希曠禮賜優渥盖有令甲所不載者
按末樂六年淳泥國王麻乃惹加那來朝賜王儀仗
交椅水罐水盆俱用銀傘扇俱銷金白羅金裝鞍馬
二疋織金文綺紗羅綾絹衣十襲王妃弟妹陪臣各

有差王尋病卒棺殮皆資尚方葬安德門外親爲樹
碑賜其子嗣王遐旺金相玉帶一金百兩銀三千兩
及錢鈔錦綺紗羅衾褥帳幔器皿王妃以下有差十
一年遐旺來朝賜黃金百兩白金五百兩鈔三千錠
百五十萬文錦四段綺紗羅八十疋金織錦繡文綺
衣各一襲并器皿衾褥帷帳等物王母及叔以下有
差又九年滿刺加國王拜里迷蘇刺來朝賜金龍衣
二襲麒麟衣一襲及金銀器皿帷幔衾褥朝辭賜金
相玉帶一儀仗一副鞍馬二疋黃金百兩白金五百
兩鈔四十萬貫銅錢二百六十萬錦繡紗羅三百疋

絹千疋渾金文綺二織金通袖膝襪二王妃冠服一
副白金二百兩鈔五千貫錦綺紗羅絹六十疋織金
文綺紗羅衣四襲王子姪陪臣賜各有差十五年
蘇祿國東王巴都葛叭峇刺西王麻哈刺吒葛刺麻
丁峒王叭都葛巴刺卜來朝各賜金相玉帶一黃金
百兩白金二千兩羅錦文綺二百疋絹三百疋鈔一
萬錠錢三百萬文金繡蟒龍文綺麒麟衣各一襲隨
從頭目賜各有差東王率德州賜葬立碑留其妃及
弟守墓三年乃歸十九年古麻刺朗國王幹刺義亦
敦奔來朝賜如蘇祿東王其年還至福州率賜葬亦

如東王

夷王賞功之優

永樂三年以日本國王源道義捕倭寇獻俘賜九章冕服鈔五千錠錢一百五十萬織金文綺紗羅絹三百七十八疋明年又賜白金千兩織金諸色綵幣二百疋綺繡衣六件銀茶壺三執銀盆及綺繡紗帳衾褥枕席器皿諸物海舟一艘又賜白金千兩錢一千五百萬錦紵絲紗羅絹四百十三疋僧衣十二襲帷帳衾褥器皿若干事王妃白金二百五十兩錢五百萬錦紵絲紗羅絹八十四疋四年占城請夾攻安南

賜鍍金銀印紗帽金帶黃金百兩白金五百兩金織文綺衣二襲錦綺紗羅有差六年以來攻安南功賜金印黃金百兩白金五百兩錦綺紗羅五十疋綵絹百疋 四年以朝鮮世子李提朝賜 御製詩白金錦綺書籍其王芳遠白金千兩絨錦綺羅百二十疋十五年以獻馬功賜 勅及白金二千兩文綺表裏二百疋紗羅絨錦五十疋馬二十四疋妃文綺表裏八十疋

賜百官食

洪武中視朝畢 上御奉天門或華蓋殿武英等殿

公侯一品官侍坐門內二品至四品及翰林院坐門外五品以下官於丹墀內贊拜叩頭就坐光祿司進膳各設饌食畢叩頭而退日以為常二十八年始罷之

山堂別集卷十四

山堂別集卷十五

吳郡王世貞元美著

皇明異典述十

致仕降級

永樂初吏部尚書張統戶部尚書王鈍以中奉大夫左布政使致仕降一級然賜獎諭非從斥典或亦不絕其祿耳

勛臣奪公孤

永樂曹國公曹景隆以罪奪特進左柱國太子太師以公歸第宣德成山侯王通奪太子太保及侯下獄

卷之十五
降爲都督僉事正統寧陽侯陳懋以劾奪太保尋復
景泰加兼太子太師天順復辭兼職同時辭太子太
師者武清侯石亨尋進封忠國公辭太子太保者都
督張輓尋進封文安伯安遠侯柳升以劾奪太傅弘
治平江伯陳銳奪太保太子太傅正德惠安伯張偉
奪太保及伯下獄復爵至嘉靖加太子太傅伏羌伯
毛銳奪太子太傅後亦復嘉靖昌國公張鶴齡奪太
師及公以南京錦衣衛都指揮閒住武定侯郭勛奪
太保太子太傅後復進至太師太子太師翊國公尋
下獄奪官死恭誠伯陶仲文辭所兼少師少傅少保

王田伯蔣榮以不敬奪太子太保咸寧侯仇鸞自甘
肅逮還赦之落太子太保起鎮大同復

孤鄉左削

景泰中戶部尚書金濂落太子太保爲工部尚書尋
復天順初禮部尚書胡濙吏部尚書王直落少傅太
子太師謹身殿大學士高穀落少保太子太傅尋致
仕吏部尚書王翱落太子太保尋加太子少保後復
故兵部尚書石璞落太子太保爲南院左都御史兵
部左侍郎俞綱落太子少傅都察院左都御史蕭維
楨右都御史羅通落太子少保仍故官成化吏部尚

書李秉落太子少保致仕兵部尚書俞子俊落太子
太保爲左都御史仍致仕後復太保尚書南京兵部
尚書王恕落太子少保致仕弘治起爲吏部尚書加
太子太保吏部尚書尹旻落太子太傅爲太子少保
尋落少保致仕工部尚書劉昭落太子少保致仕正
德太子少保文淵閣大學士曹元併落尚書嘉靖中
大學士桂萼落少保太子太傅致仕尋復吏部尚書
歐陽必進落少保太子太保尋致仕禮部尚書兼學
士溫仁和被論落太子少保刑部尚書聞淵落太子
少保尋加太子太保爲吏部尚書少師大學士高拱

削官職閒住刑部尚書潘季馴削太子少保爲民後
起右都御史仍落宮保其致仕後削官者正德中大
學士劉健大學士焦芳俱落少師太子少師大學士
謝遷劉宇俱落少傅太子太傅大學士楊廷和蔣冕
毛紀尚書喬宇彭澤盡落其少師少傅少保并尚書
大學士銜嘉靖中大學士賈誅以迎駕誤朝落少保
太子太保後年至八十復之工部尚書朱衡以山陵
事落太子太保太子太保禮部尚書潘晟起兼武英
殿大學士尋致仕再削官閒住太子少保兵部尚書
凌雲翼一落宮保尚書 閒住其累降累復者嘉靖

特進光祿大夫上柱國少師太子少師禮部尚書武英殿大學士夏言致仕至灣召入落階勛及少師太子太師爲少傅太子太傅尋悉復之進吏部尚書華蓋殿大學士復賜歸未行落少師華蓋殿爲少傅太子太師禮部尚書武英殿大學士滿九載悉復之仍落階勛官職閒住久之以禮部尚書武英殿大學士致仕召用仍悉復故官再落階勛師殿銜以吏部尚書致仕逮下獄論死後復故官

死後追削生前公孤宮秩

嘉靖八年以謬議大禮追削毛澄太子太傅林俊太

子太保萬曆十一年以執政怙肆追削張居正太師兼太子太師

死後削公孤贈及謚

太子太保工部尚書李鏊贈太保謚恭敏以行履不稱且太學士楊一清私與削太子少保禮部尚書贈太子太保謚榮簡盛端明太子太保禮部尚書贈少保謚榮僖顧可學禮部尚書贈少師謚文康榮靖邵元節恭誠伯謚榮康惠肅陶仲文俱以隆慶初元削張居正上柱國以萬曆十年削其削文忠謚以十一年

訪仙進秩

未樂中胡忠安公澗以訪仙人張三丰不值由都諫超爲少宗伯嘉靖中王大任姜儼以訪仙及符篆秘方超爲侍讀學士其後榮悴之頓殊者忠安蓋別有托也

中貴歲米

中貴人雖尊重用事而太監品不過正四計日止廩米升半及衣帽鞞料而已

高帝時既定監局職名後中書省請量增歲祿至十二石不許其後有以軍功加者如吉祥劉永誠之類

蓋以十二石爲一級也然多不過三十六石而止惟成化中御馬監太監汪直初以緝事功加歲米二十四石以建州功加三十六石以威寧海功加四十八石以黑石崕功加三百石後累至四百八十石正德中司禮監太監張永初以恩加歲米十二石以平寧夏逆瑾功加四十八石以獲妖人功加一百二十石後累至三百餘石東廠太監張忠以獲妖賊功加歲米二百二十石前後緝賊及應州等功亦累至三百餘石大約米至七十二石則當爲正一品而儻從衣料亦累增益不可勝計蓋又王振劉瑾之所無也嘉

靖司禮太監張佐累加至二百四十二石麥福加至三百七十石黃錦加至五百餘石

三廠

永樂十八年立東廠命內官一人主撥錦衣衛官校刺訶大小事情成化十二年增立東廠命御馬監太監汪直主之權出東廠上正德三年東廠有太監丘聚西廠太監谷大用矣復以榮府舊倉地爲內行廠司禮太監劉瑾自領之得訶察一切及二廠不法事

中貴家屬勛封

昭武伯曹欽司禮監太監吉祥從子爲後者也亦自

以戰功從吉祥奪門封後誅成化寧晉伯劉聚御馬監太監朱誠從子爲後者也從朱誠積戰功至左都督自以破西虜功封襲正德中泰安伯張富司禮監太監朱兄也定安伯容朱兄也高平伯谷大寬提督團營太監大用兄也朱清伯大亮大用弟也鎮安伯魏英司禮監太監彬弟也平涼伯馬山提督東廠太監朱成姪也鎮平伯陸朱監鎗太監閻姪也皆冒朱等恩澤封後俱革馬山雖貴衣蟒圍玉爲朱成汲水澆花調馬於庭他亦徃七類是

內臣封父

以功恩以德若振罪魁也此祀為不經矣

特賜蔣山寺廣薦佛會

翰林學士宋濂記畧洪武四年冬十有二月詔徵江南高僧十人欽天監擇日於蔣山太平興國禪寺建廣薦法會 上宿齋室却葷肉弗御者一月復勅中書右丞相汪廣洋左丞相胡惟庸移書城社之神具宣 上意俾達諸冥期以畢集明年春正月辛酉昧爽 上服皮弁臨奉天殿群臣朝衣左右侍尚寶卿梁子忠啟御撰章奏識以 皇帝之寶 上再拜燎香於鑪復再拜躬視疏已授禮部尚書陶凱凱捧從

黃道出午門寘龍輿中備法仗鼓吹導至蔣山天界總持萬金及蔣山主僧行容率僧伽千人持香華出迎取疏入大雄殿用梵法從事白而焚之退閱三藏諸文自辛酉至癸亥止當癸亥日時加申詣浮屠行祠事已 上法駕臨幸雲中雨五色乎如豆或謂娑羅子或謂天華墜地所變 上服皮弁搢玉圭上殿禮佛北嚮立群臣各衣法服以從和聲郎舉麾奏悅佛之樂首曰善世曲 上再拜迎群臣亦再拜再奏昭信曲 上跪進薰蕪奠幣復再拜樂三奏延慈曲相以悅佛之舞舞人十其手各有所執或香或燈或

珠玉明水或青蓮花冰堯暨名薜衣食之物勢皆低
昂應以節 上行初獻禮跪進清淨饌史冊祝復再
拜亞終二獻同其殊異者不用冊光祿寺鄉徐與祖
進饌樂四奏曰法喜曲五奏曰禪悅曲舞同三獻已
上還大次群臣退諸僧旋遶佛座演呪梵呪三周以
寓攀注之意初劄山石地成六十坎漫以堊至是令
軍卒五百負湯實之湯蒸氣成雲諸僧速幽爽入浴
焚象衣使其更以彩幢法樂引至三解脫門每門內
五十步築方壇高四尺 上升壇東嚮坐侍儀使浦
傳西嚮跪受詔而出集幽爽而戒飭之詔已引入殿

致三佛之禮聽法於徑山禪師宗泐受毗尼戒於天
竺法師慧日復引而出命執範師飯摩伽陀斛法食
凡四十九飯已夜將半 上復上殿群臣從如初樂
六奏偏應曲執事者徹豆 上再拜群臣從拜七奏
妙濟曲 上拜送者再群臣復從拜八奏善成曲
上至望位燎已還大次解嚴群臣趨出濂復跋十四
日甲午大風晦雨雪交作至午忽開霽 上悅勅近
臣於秦淮河燃水燈萬枝十五日夜過半竣事還宮
隨有佛光五道從東北貫月燭天良久乃已書之見
高帝之於釋門典禮之異如此

番僧封爵之異

永樂三年封西僧尚師哈立麻爲萬行具足十方最勝圓覺妙智慧善普應祐國演教如來大寶法王西天大善自在佛領天下釋教事賜玉印誥命十年封其徒尚師毘澤思巴爲萬行圓融妙法寂勝真如慧智弘慈廣澤護國宣教正覺大乘法王西天上善金剛普應大光明佛餘如前成化中封西僧尚師劄巴堅叅爲萬行莊嚴功德寂勝智慧圓明能仁感應顯國光教弘妙大悟法王西天至善金剛普濟大智慧佛領天下釋教事尚師即 帝師史諱之也按元時

贈帝師有皇天之下一人之上其稱尤異然不云佛而云佛子又其他銜名亦小簡

道教封爵之異

洪武中封張正常爲正一教主嗣漢四十二代天師護國闡祖通誠崇道弘德大真人領天下道教事宜德封高道劉淵然爲冲虛至道玄妙無爲光範衍教莊靖普濟長春大真人嘉靖封邵元節爲清微妙濟守靜脩真疑玄衍範志默秉誠致一真人禮部尚書兼管朝天顯靈靈濟三宮摠領道教事封陶仲文爲神霄紫府闡範保國弘烈宣教振法通真忠孝秉一

真人特進光祿大夫柱國恭誠伯兼管三宮總領道
教事時徽王厚燭遼王憲燼亦自乞封真人授黃金
印其印特大於國封之寶

真人得內閣恩典

真人陶仲文以少師一品考六年滿加特進光祿大
夫柱國兼支大學士俸蔭一子尚寶司丞

夷王封號之異

未樂封安南國王陳天平降其僭王胡奩曰順化郡
公宣德赦安南黎利其銜曰權署國事正德朝鮮王
傳位其弟普城君懌勅封以國王體統行事嘉靖安

南莫登庸命降爲安南都統從二品銀印

殉葬宮妃之典

英宗遺命止宮妃殉葬此誠千古帝王之盛節而
未有能考累朝從殉之人與事者故畧記之 高

皇帝殉葬宮人係建文中追封不可考獨有所謂張

鳳李衡趙福張璧汪賓者初以錦衣衛所試百戶散

騎帶刀舍人進爲本所千戶百戶未樂初議革建文

陸授官員上曰他每這幾家都是好職事不動通

調孝陵衛帶俸世襲至今人謂之太祖朝天女

戶太宗殉葬諸妃考仁廟錄不見贈謚當是誤

遺之耳

洪熙元年七月追謚 皇庶母 仁宗貴妃郭氏曰
恭肅淑妃王氏曰貞惠麗妃王氏曰惠安順妃譚氏
曰恭僖充妃黃氏曰恭靖內郭氏二王氏即二十二
年十月所冊立者也

宣德十年八月追贈 皇庶母宣宗惠妃何氏爲貴
妃謚端靜趙氏爲賢妃謚純靜吳氏爲惠妃謚貞順
焦氏爲淑妃謚莊靜曹氏爲敬妃謚莊順徐氏爲順
妃謚貞惠袁氏爲麗妃謚恭定諸氏爲恭妃謚貞靜
李氏爲充妃謚恭順何氏爲成妃謚肅僖其冊辭曰

茲委身而蹈義隨龍馭以上賓宜薦徽稱用彰節行
又考正統四年六月周憲王有燉薨無子乙酉 上
貽書王弟祥符王有燭令其自妃夫人以下不必從
死年少有父母各遣歸其家又十日乙未憲王府以
王正室鞏氏等死殉事聞賜謚貞烈贈夫人施氏歐
氏韓氏陳氏張氏李氏俱賜謚貞順贈夫人予祭及
葬用一品禮未及聞 上命故也當是時 帝甫十
三而有此書其止殉張本哉至成化四年遼王豪盛
上言嫡長子恩滿夭亡子欲以其婦馮氏妾曹氏殉
上貽書切責之令移其婦妾於宮中供養如法母使

失所然二十二年寧河康僖王卒宮人王氏楊氏張氏段氏俱自盡俱贈夫人賜祭及葬蓋上以其節烈而旌之不知其亦從殉也嗚呼英廟之仁澤遠且大矣

誅公侯二特詔

國朝誅勛臣大將如藍玉輩俱無詔示天下其頒詔者僅忠國公石亨太傅咸寧侯仇鸞而已今記於後天順四年二月初四日詔曰朕惟有功者必賞有罪者必罰此古昔帝王馭世之要道我祖宗垂統之成法也朕遵之而豈敢有私且如犯人石亨拔自下

僚荐歷封爵暨朕順天應人以復大位而亨適逢其會掩以爲功朕于時信之不疑爵以上公寵以甲第金帛之賚莫與爲比崇報之厚亦已極矣豈期石亨貌若忠厚心實狡險作威作福贖貨無厭欺壓諸司賣官鬻獄縱姪石彪肆爲兇逆暗結人心圖謀鎮守法司論亨罪當連坐朕念其微勞累次寬宥特令閒住以保全之亨乃不知感悟怨謗多端包藏禍心潛謀不軌幸而天地不容事乃發露文武大臣僉謂石亨罪大惡極不可再赦朕不得已置之於法書不云乎自作孽不可逭朕雖欲曲爲保全豈可得哉爾

文武群臣繼今以後宜用爲戒毋怙恩以違大義然
石亨所犯乃其自取於衆無預除將親識情熟之人
發遣外其餘頭目人等曾出入門下者悉置免究爾
等尚其同心同德勉輔我邦家欽哉故諭嘉靖三十
一年九月初四日詔曰朕嗣守丕基法 祖圖治比
因醜虜侵擾邊境靡寧思欲選將練兵以爲攘外安
內之計二十九年虜入犯京畿賊臣仇鸞自大同擁
兵入衛要以爲功朕非不識姑試用之付以京營戎
政之任假之寵異冀其感恩改善爲朕討虜詎意此
逆懷蓄異志欺誑朕躬背叛朝廷通虜結好求箭燧

爲號臨陣不與廝殺二年之間一卒不練迹其所爲
唯欲合謀乘釁志圖匪細大逆不道罪深惡極天地
不容神人共憤彼身先殛死事尋敗露已將通虜人
犯勾引情跡鞫審得實逆鸞仍劈棺提尸斬首九邊
梟示併各犯家屬人等明正典刑朕思此逆外假忠
名中藏禍心非朕燭其險詐伐其逆謀幾何不蹈宋
巨奸之所爲者惟 上天賜佑 宗社有靈滅此禍
本以安邦家即擇吉遣官恭行奏謝 南北郊告謝
太廟 社稷 先聖帝王特茲詔示於戲瘳惡伐
罪國家之憲典具存福善禍淫天道之鑒臨不爽播

告天下咸使聞知

罷輔臣特勅

國朝內閣輔臣罷任多以禮待其重而削奪者亦不過於批旨內行遣而已嘉靖中寵任之極無過於張夏而二公罷相皆有勅諭群臣八年八月十五日諭朕本藩服以我皇兄武宗毅皇帝青宮未建上賓之日遺詔命朕入繼大統以奉天地社稷之祀君主臣民當是時楊廷和等懷貪天之功襲用宋濮安懿王之陋事以朕比擬英宗毒離父子之親敗亂天倫之正朕方在冲年蒙昧致彼愈爲欺侮其時幸賴

皇天垂鑒祖宗默佑以今輔臣張璉首倡正議忘身捐命不下鋒鏑之間後遂致人倫潰而復叙父子散而復完厥功具載莫可泯遠朕念璉等忠王事授以重職擢居輔導欲其全君臣始終之義之美柰何璉等自居官以來不思圖終之難頓忘謹始之志自用自恣負君負國所爲事端昭然衆見而桂萼尤甚近以言官屢劾朕不敢私論法本當置諸刑典特從寬貸璉令還家愴悟以資後用萼奪其散官併學士職銜回籍致仕其餘黨分別區處庶幾仁之中義之公而盡焉又照給事中孫應奎王準陸粲居言官之

列有耳目之寄既知大臣若斯却乃坐觀至此方行
舉劾實非忠愛之本心亦負朝廷之委任者也應奎
首爲進言姑免究陸粲已究外王準也着法司提了
問茲特諭爾文武群臣庶令咸知朕意其璉等既已
處置了他每罪固不可掩而功尤不可掩內外大小
官員軍民人等不許乘此挾私讐奏擾敢有違的決
行重治不宥尚賴文武群臣協力同心匡朕不逮凡
近日所行事務有未當者都着條奏更正可行的不
許一槩混開勿得罔上縱私効傲爲事七或敗露法
典具在必罪治之爾禮部便轉行都察院刻布天下

悉使知之故諭十年 月 日勅諭三法司薛侃以
猖狂之性發不諱之言據其言似忠謀遠慮但朕非
宋仁宗向暮之年原其心實懷欺罔忍於言君終無
建嗣之期妄生異議致惹事端法司擬罪來看彭澤
質非有用性本無良小人狡詐之資奸邪譎詭之行
往來構禍搬弄是非致薛侃招稱有干宗室傷朕親
比之情俾輔臣急於攻擊害朕君臣之義罪犯深重
法當處死姑從寬宥發邊遠地面充軍輔臣張孚敬
初以建言大禮朕特不次進用既而被人彈劾有旨
令其省改却乃不慎於思罔悛於性朕心腹是托奚

止股肱而已望以伊傅之任豈惟待遇是隆乃昧休
匕有容之量犯戚匕媚嫉之科殊非朕所倚賴專於
忌惡甚失丞弼之任難以優從着致仕去夏言旣于
斯事無干不合拍案喧罵匪徒失儀亦涉爭報念其
被害所激赦而不問孫應奎曹汴職在糾舉豈責彼
言但其時事未明白遽斥輔臣跡涉回護故朕併令
拿問今念係言官亦從赦放其餘見監人犯悉宥之
此事旣經區處爾在朝大小官員宜思革除私忿務
爲盡忠効古人事君同寅協恭之心守聖人事君不
貳不欺之訓匡朕不逮以臻至化庶不負其君忝其

親永有譽聞二十一年六月朔之次日手勅諭都察
院近日人事愆違天垂仁愛雨澤方至禾茂民康今
雨下竟朝矣丞弼之臣宜忠敬清亮者居之故曰燮
理調和之職也朕承 皇天眷命以神王二道裁理
天下非求仙用夷荒昧之爲止是一早朝終始不一
耳然君逸臣勞務本抑末失小顧大先賢用之朕雖
失此早一臨門視多命攝愛此身僉是父母遺我者
宗禮帝神加志天下不曾色荒聲迷於不省人事之
地無一時不思天下付民上賴爲人君之職所當懼
者柰何世降人浮求一人才夾輔卒不可得昨夏言

測東宮遷移無故稱改慈慶爲東宮府夫廢

母后備制以縱奉子朕必不爲言前稱朕意爲正駁郭勛爲非今何一用勛言若今謂爲忠正前亦忠正前謂爲非則今亦非也夫嫉人賢已必欲美皆已出惡亦無歸夫何謂郭勛以不領勅下獄矣猶千羅百織如何自擬君旨謂不必用勅言官係朝廷耳目一犬不如專一聽受主使逆君沽譽傾人取位以奉所悅或戕人一家以代報復吁是人爲乎又凡工作例有內官監官昨撰大享殿興工何無高忠勅稿前歲忠代言進玉器祝壽朕已疑其與彼同計矣今果通

泄朕言不具勅稿果無例耶果不通謀耶昨又聞乘轎苑中次日朕以香葉束髮巾用皮帛鞋以便跪起彼謂不可夫無賜而自乘擅也有命而抗違非禮也且朕不早朝彼亦不入內閣軍國重事徑自私家而專裁之王言要密豈宜人臣視如戲具如此大事言官豈無一人知見不聞一言片疏糾發徒知欺謗君主美法舞文排擠忠直貪生媚寵今日神鬼皆怒兩甚傷禾卿等布諭俾中外知之時言待罪於家又十五日降口宣召入拜皇考諱辰御仍直候內苑禮成言具疏謝罪畱中至七月朔始奉御批言始因

朕諭孚敬令上疏論郊禮漸階寵用出群臣之首累次放恣欺慢全無驚愍面諛退誹深負朕恩遇優禮之甚囑當日食太重正坐下慢上之咎令革職閒住已乃降勅諭禮部曰今日仰天心下眷本朕不才累及太陽正坐臣子欺逼君父外陰侵犯內陽之咎夫天子者有臣道焉豈可居母位以匹夫是一失厥當退處本位夏言以臣欺凌君上作威作福不下郭勛之罪但卿五六人累年供事內苑讚誠左右獨因此切軫朕心故免死去之用仰承天戒是二失中華陽外夷陰今夷犯華若蹈荒原可見此時內外臣工

通不愛民如身視國如家是三失若是三咎厥災甚大伏荷 皇天降示朕丕感弗勝即於明日爲始修省三日初五日躬祗告于玄極殿內外大小百工宜各洗淨乃心脩舉乃職目即戎務爲急司其事者盡心圖濟用保吾民禮部刊刻頒布天下敬哉敬哉詳夏之得罪每以偃蹇傲惰見咎而迄不知省以至敗僂如十八年五月己巳先是 上幸大峪山閱視陵工內閣以居守勅稿進覽遲緩 上不悅因責輔臣夏言欺慢狀言具疏引罪 上大怒曰言自微官朕命張孚敬示令建贊 郊禮之儀遂不次進官其

所倚任皆朝廷恩眷自當益勵公勤盡忠事主乃每
上怠慢不恭昨所選擬宮僚多不稱用密疏既不遵
式却借封皮以便私情既不遵奉原賜印記并歷年
御帖可即進繳御前雖無稿其數尚可查考無得隱
匿取罪宜痛自省改以供職業言復自陳臣一介凡
庸遭逢 聖明在上追惟 郊禮之議雖小有論贊
寔首發自 淵衷成以 睿斷臣實何知何能遂蒙
顯拔不次進用臣非大馬草木敢不思感恩圖報於
萬一昨扈從南巡偶以疾昏迷時典禮方殷因勉強
赴閣供事至於錄進舊文併譔居守勅稿既失稽遲

而密疏之陳又屢違欽式不意 聖度優弘勉之省
改使得自新臣於此惟有感激流涕痛自悔省而已
復欽奉 聖諭令以原賜印記并歷年諭帖進繳臣
於恐懇待罪之餘尚有意外祈息之望蓋印記之文
乃特賜嘉獎 聖諭諸帖皆親灑宸翰比隆於典謨
訓誥已編之御集當傳之萬世惟是臣之家藏實臣
一時遭際之榮爲子孫百世之寶今一旦追取臣忍
舍之伏望重加矜念仍以賜臣或別加罰治則臣死
且不朽矣疏入 上曰言旣寶君命手澤可見其實
有旨追取數日不繳必有殘壞禮部即取進繳姑念

昔日贊議 郊典革其勛階少師官職其以少保兼尚書學士致仕言乃檢手勅諭帖自嘉靖九年起至十八年共四百餘道爲十二匣銀印記一顆具疏上之 上諭吏部閣臣夏言初出朕簡用首因奉示建贊 北郊茲典至大言知之真正克贊成之朕嘗曰昔孚敬爲綱常立論正吾父子之名言不忌禍患能贊吾復 皇祖初禮二臣於我有功不意言以惰慢之資超進丞弼之任身居是位猶不警勵昨已令去之然朕復念言建助大儀力贊 陵議復他少傅蒞太子太傅禮部尚書武英殿大學士還閣辦事贊終

喪禮宜省思盡忠未可怨尤君上也即日任事初言既罷政將行詣闕辭 上遣司禮官止之命還家候旨隨降是諭言即進閣上疏謝 上報曰覽卿已起閣朕知悅已卿宜益勵初忠盡心輔政事秉公持正不惟副朕任亦免衆忿也卿其思之言復疏謝且言自處不敢後於他人一志孤立爲衆所忌

上覽之不悅隨詰責之并硃塗疏中洗改字數處言乃惶恐引罪得旨報聞亡何 上以 奉先殿雷震召大學士夏言顧鼎臣往視時畧已移辰矣而言等尚未入政府 上不悅曰輔臣朕所憑倚恣逸若是

何以表率群工命禮部劾之言等請罪 上曰朕每寬言過非爲言爲左右義重也言乃滋傲惰成性蔑不知倣其何以表率百僚鼎臣亦相劾旣已知罪姑宥之自後諸司敢踵過蹈非者禮部都察院叅奏相黨護者連坐十九年五月始給還進繳御札四百三道銀記一刻手勅一道二十年八月言久疾在告上以慈壽晏駕 皇太子服制議示言具疏對誤寫字號被 旨切責令從實陳狀言引咎謝罪并乞假還鄉治疾 上怒曰言初以言職朕命乎敬傳示令上言郊禮自是異擢崇遷眷出群臣上何肆意放恣

一至於此茲方 廟災修省之初 皇伯母大喪之際邊圉未靖屬主憂之時乃罔思體念居出任意病已將平敢於求逸大負倚注本當遣問第念徃勞落職令致仕去因盡削其階勛職秩止令以禮書帶武英殿學而已言初測知 上怒奏備虜事宜 上荅曰言旣蘊忠謀何乃堅於自愛負朕眷倚姑不究又五日爲九月朔諭禮部今古異時縱孔子生未必不與我同朕自十三年受病重咳六十日餘昨冬復得竒疾非熱非寒臥三旬乃起早朝遂廢百司盡怠不知君父本心非放恣聲色大抵生長南方多脆非北

地比柰夏言首輔先懈群臣効尤姑令罷去今在位者務思忠勞之實勿慢天欺君曠職自肆又六日壬辰言入詣迎和門辭賜酒饌無逸殿仍令還私宅調理以俟後命至九月丁卯一月餘乃詔以少傅太子太師禮部尚書武英大學士赴閣仍賜假調理令於十一月廷謝履任至壬寅之詔凡三褫矣戊申兵部議三邊侍郎曾銑復河套疏上上以言主議銜之下問內閣露意大學士嚴嵩遂攻言上批謂言於銑疏初至時乃密疏稱人臣未有如銑忠者朕已燭其私但知肆其所爲不顧國安危民生死惟徇曾

銑之欲云七言懼自辨上批荅爾等朝廷倚政之本百爾自宜先以邦民爲心如何專徇私情強君協衆昔密奏未允乃詐稱上意必行茲所奏又無引罪詞吏禮二部會都察院叅看以聞部院叅言事惟任意跡涉強君上曰爾等奉旨議奏猶謂跡涉此非媚即畏是何臣體姑不究夏言削奪餘官以尚書致仕尋捕曾銑子淳及言婦翁下獄得其交通事狀詔夏言着錦衣衛差官校逮繫來京問三法司謂言法固當斬以直侍多年効有勞勩據律有議能議貴之條請自上裁上怒曰爾等任曰執法豈不知恩威

當自 上出乃敢借意朋護朕視言爲腹心言則視君爲何方銑疏上時即密奏強君朕何嘗一言諭荅敢動稱有密諭主行及事敗止令致仕又不知引罪故作怨語曰前去因不帶香巾爲朝廷計非以身家是入臣禮歟彼正以西內二三月直候不得見蘇綱爲辭爾等又爲言直侍內苑堅恣朋護之私是何法理其更擬奏遂同銑原坐交結近侍官員紊亂朝政律斬妻子流三千里及秋竟不免

隆慶六年六月 日皇后懿旨皇貴妃令旨皇帝聖旨說與內閣五府六部等衙門官員 大行皇帝賓

天先一日召內閣三臣在御榻前同我母子三人親受遺囑說東宮年小要你們輔佐今有大學士高拱專權擅政朝廷威福都強奪自專通不許皇帝主管不知他要何爲我母子三人驚懼不寧高拱便着回籍閑住不許停留你每大臣受國家厚恩當思竭忠報主如何只阿附權臣蔑視幼主姑且不究今後都要洗心滌慮用心辦事如再有這等的處以典刑

弇山堂別集卷十五終

